

# Peristephanon

textus ad verbum sumptus ex editione  
clarissimi viri Ioannis Bergman  
in lucem edita anno domini 1926 (*CSEL* 61)

Clemens Aurelius Prudentius

saec. iv exeunte  
(February 10, 2006)



# Contents

Praefatio	1
I In honorem Emetrii et Chelidonii	3
II In honorem passionis Laurentii	7
III In honorem passionis Eulaliae	23
IV In honorem decem et octo Caesaraugurstanorum	29
V Passio Sancti Vincentis	35
VI In honorem Fructuosi et Augurii et Eulogii	51
VII In honorem Quirini, Episcopi Ecclesiae Siscianae	57
VIII De baptisterio Calagurri, in quo martyres passi sunt	61
IX Passio sancti Cassiani Forocorneliensis	63
X Sancti Romani contra gentiles dicta	67
XI Ad Valerianum de Passione Hippolyti beatissimi martyris	97
XII Passio Apostolorum Petri et Pauli	103
XIII Passio Cypriani	105
XIV Passio Agnetis	109
⟨Epilogus⟩	113



# PRAEFATIO

Per quinquennia iam decem,  
ni fallor, fuimus; septimus insuper  
annum cardo rotat, dum fruimur sole uolubili.

5        Instat terminus et diem  
uicinum senio iam deus adplicat:  
quid nos utile tanti spatio temporis egimus?

Aetas prima crepantibus  
fleuit sub ferulis, mox docuit toga  
infectum uitiis falsa loqui non sine crimine.

10        Tum lasciuia proteruitas  
et luxus petulans—heu pudet ac piget!—  
foedauit iuuenem nequitiae sordibus et luto.

15        Exim iurgia turbidos  
armarunt animos et male pertinax  
uincendi studium subiacuit casibus asperis.

Bis legum moderamine  
frenos nobilium reximus urbium:  
ius ciuile bonis reddidimus, terruimus reos.

20        Tandem militiae gradu  
euectum pietas principis extulit  
adsumptum propius stare iubens ordine proximo.

Haec dum uita uolans agit,  
inrepsit subito canities seni  
oblitum ueteris me Saliae consulis arguens,

25        sub quo prima dies mihi  
quam multas hiemes uoluerit et rosas  
pratis post glaciem reddiderit, nix capitis probat.

30        Numquid talia proderunt  
carnis post obitum uel bona uel mala,  
cum iam, quidquid id est, quod fueram, mors aboleuerit?

Dicendum mihi: 'Quisquis es,  
mundum, quem coluit, mens tua perdidit;  
non sunt illa dei, quae studuit, cuius habebis.'

35           Atqui fine sub ultimo  
peccatrix anima stultitiam exuat;  
saltem uoce deum concelebret, si meritis nequit.

Hymnis continuet dies  
nec nox ulla uacet, quin dominum canat;  
pugnet contra hereses, catholicam discutiat fidem;

40           conculcet sacra gentium,  
labem, Roma, tuis inferat idolis;  
carmen martyribus deuoueat, laudet apostolos.

45           Haec dum scribo uel eloquor,  
uinclis o utinam corporis emicem  
liber, quo tulerit lingua sono mobilis ultimo!

# I HYMNUS IN HONOREM SANCTORUM MARTYRUM EMETERII ET CHELIDONII CALAGURRITANORUM

Scripta sunt caelo duorum martyrum uocabula,  
aureis quae Christus illic adnotauit litteris,  
sanguinis notis eadem scripta terris tradidit.

5 Pollet hoc felix per orbem terra Hibera stemmate,  
hic locus dignus tenendis ossibus uisus deo,  
qui beatorum pudicus esset hospes corporum.

Hic calentes hausit undas caede tinctus duplici,  
inlitas cruore sancto nunc harenas incolae  
confrequentant obsecrantes uoce, uotis, munere.

10 Exteri nec non et orbis huc colonus aduenit,  
fama nam terras in omnes percucurrit proditrix  
hic patronos esse mundi, quos precantes ambient.

Nemo puras hic rogando frustra conguessit preces,  
laetus hinc tersis reuertit supplicator fletibus  
15 omne, quod iustum poposcit, impetratum sentiens.

Tanta pro nostris periculis cura suffragantium est,  
non sinunt inane ut ullus uoce murmur fuderit,  
audiunt statimque ad aurem regis aeterni ferunt.

20 Inde larga fonte ab ipso dona terris influunt,  
supplicum causas petitis quae medellis inrigant;  
nil suis bonus negauit Christus umquam testibus,

testibus, quos nec catenae dura nec mors terruit  
unicum deum fateri sanguinis dispendio,  
sanguinis, sed tale damnum lux rependit longior.

25 Hoc genus mortis decorum, hoc probis dignum uiris:  
membra morbis exedenda texta uenis languidis  
hostico donare ferro morte et hostem uincere.

30 Pulchra res ictum sub ense persecutoris pati,  
nobilis per uulnus amplum porta iustis panditur,  
lota mens in fonte rubro sede cordis exilit.

Nec rudem crudi laboris ante uitam duxerant  
milites, quos ad perenne cingulum Christus uocat,  
sueta uirtus bello et armis nunc fidei militat.

35 Caesaris uexilla relinquunt, eligunt signum crucis,  
proque uentosis draconum, quos gerebant, palliis  
praeferunt insigne lignum, quod draconem subdidit.

Vile censent expeditis ferre dextris spicula,  
machinis murum ferire, castra fossis cingere,  
inpias manus cruentis inquinare stragibus.

40 Forte tunc atrox secundos Istrahelis posteros  
ductor aulae mundialis ire ad aram iusserat,  
idolis litare nigris, esse Christi defugas.

45 Liberam succincta ferro pestis urgebat fidem,  
ille uirgas et secures et bisulcas ungulas  
ultro fortis expetebat Christi amore interrita.

Carcer inligata duris colla bacis inpedit,  
barbaras forum per omne tortor exercet manus,  
ueritas crimen putatur, uox fidelis plectitur.

50 Tunc et ense caesa uirtus triste percussit solum  
et rogis ingesta maestis ore flammis sorbuit,  
dulce tunc iustis cremari, dulce ferrum perpeti.

Hic duorum cara fratrum concalescunt pectora,  
fida quos per omne tempus iunxerat sodalitas,  
stant parati ferre, quidquid sors tulisset ultima,

55 seu foret praebenda ceruix ad bipennem publicam  
uerberum post uim crepantum, post catastas igneas,  
siue pardis offerendum pectus aut leonibus.

60 'Nosne Christo procreati mammonae dicabimur  
et dei formam gerentes seruiemus saeculo?  
absit ut caelestis ignis se tenebris misceat.

Sit satis, quod capta primo uita sub chirografo  
debitum persoluit omne functa rebus Caesaris,  
tempus est deo rependi, quidquid est proprium dei.

65 Ite, signorum magistri, et uos, tribuni, absistite,  
aureos auferte torques, sauciorum praemia!  
clara nos hinc angelorum iam uocant stipendia.



Christus illic candidatis praesidet cohortibus  
et throno regnans ab alto damnat infames deos  
uosque, qui ridenda uobis monstra diuos fingitis.'

70 Haec loquentes obruuntur mille poenis martyres,  
nexibus manus utrasque flexus inuoluit rigor  
et chalybs adtrita colla grauibus ambit circulis.

O uetustatis silentis obsoleta obliuio!  
75 inuidentur ista nobis fama et ipsa extinguitur,  
chartulas blasphemus olim nam satelles abstulit,

ne tenacibus libellis erudita saecula  
ordinem, tempus modumque passionis proditum  
dulcibus linguis per aures posteriorum spargerent.

80 Hoc tamen solum uetusta subtrahunt silentia,  
iugibus longum catenis an capillum pauerint,  
quo uiros dolore tortor quaue pompa ornauerit.

Illa laus occulta non est nec senescit tempore,  
missa quod sursum per auras euolarunt munera,  
quae uiam patere caeli praemicando ostenderent.

85 Illius fidem figurans nube fertur anulus,  
his sui dat pignus oris, ut ferunt, orarium,  
quae superno rapta flatu lucis intrant intimum.

Per poli liquentis axem fulgor auri absconditur  
ac diu uisum sequacem textilis candor fugit,  
90 subuehantur usque in astra nec uidentur amplius.

Vidit hoc conuentus adstans, ipse uidit carnifex  
et manum repressit haerens ac stupore obpalluit,  
sed tamen peregit ictum, ne periret gloria.

95 Iamne credis, bruta quondam Vasconum gentilitas,  
quam sacrum crudelis error immolarit sanguinem?  
credis in deum relatos hostiarum spritus?

Cerne, quam palam feroces hic domentur daemones,  
qui lupino capta ritu deuorant praecordia,  
strangulant mentes et ipsas seque miscent sensibus.

100 Tunc suo iam plenus hoste sistitur furens homo  
spumeas efflans salivas, cruda torquens lumina,  
expiandus quaestione non suorum criminum.

Audias, nec tortor adstat, heiulatus flebiles,  
scinditur per flagra corpus, nec flagellum cernitur,  
105 crescit et suspensus ipse uinculis latentibus.

His modis spurcum latronem martyrum uirtus quatit,  
haec coercet, torquet, urit, haec catenas incutit,  
praedo uexatus relictis se medullis exuit.

110 Linqvit inlaesam rapinam, faucibus siccis fugit,  
ungue ab imo usque ad capillum salua reddit omnia  
confitens ardere sese; nam gehennae est incola.

Quid loquar purgata longis alba morbis corpora,  
algidus cum decoloros horror artus concutit,  
hic tumor uultum relinquit, hic color uerus redit?

115 Hoc bonum saluator ipse, quo fruamur, praestitit,  
martyrum cum membra nostro consecrauit oppido,  
sospitant quae nunc colonos, quos Hiberus alluit.

120 State nunc, hymnite, matres, pro receptis paruulis,  
coniugum salute laeta uox maritarum strepat,  
sit dies haec festa nobis, sit sacratum gaudium!

## II

# HYMNUS IN HONOREM PASSIONIS LAURENTII BEATISSIMI MARTYRIS.

Antiqua fanorum parens,  
iam Roma Christo dedita,  
Laurentio uictrix duce  
ritum triumphas barbarum.

5 Reges superbos uiceras  
populosque frenis presseras,  
nunc monstruosis idolis  
inponis imperii iugum.

10 Haec sola derat gloria  
urbis togatae insignibus,  
feritate capta gentium  
domaret ut spurcum Iouem,

15 non turbulentis uiribus  
Cossi, Camilli aut Caesaris,  
sed martyris Laurentii  
non incruento proelio.

20 Armata pugnauit Fides  
proprii cruoris prodiga;  
nam morte mortem diruit  
ac semet inpendit sibi.

Fore hoc sacerdos dixerat  
iam Xystus adfixus cruci  
Laurentium flentem uidens  
crucis sub ipso stipite:

25 'Desiste discessu meo  
fletum dolenter fundere!  
praecedo, frater; tu quoque  
post hoc sequeris triduum.'

30           Extrema uox episcopi,  
praenuntiatrix gloriae,  
nihil fefellit; nam dies  
praedicta palmam praetulit.

35           Qua uoce, quantis laudibus  
celebrabo mortis ordinem,  
quo passionem carmine  
digne retexens concinam?

40           Hic primus e septem uiris,  
qui stant ad aram proximi,  
leuuita sublimis gradu  
et ceteris praestantior,

          claustris sacrorum praeerat  
caelestis arcanum domus  
fidis gubernans clauibus  
uotasque dispensans opes.

45           Versat famem pecuniae  
praefectus urbi regiae,  
minister insani ducis,  
exactor auri et sanguinis,

50           qua ui latentes eruat  
nummos operta existimans  
talenta sub sacrariis  
cumulosque congestos tegi.

55           Laurentium sisti iubet,  
exquirit arcam ditibus  
massis refertam et fulgidae  
montes monetae conditos.

60           ‘Soletis’, inquit, ‘conqueri  
saeuire nos iusto amplius,  
cum christiana corpora  
plus quam cruento scindimus.

          Abest atrocioribus  
censura feruens motibus,  
blande et quiete efflagito,  
quod sponte obire debeas.

65           Hunc esse uestris orgiis  
moremque et artem proditum est,  
hanc disciplinam foederis,  
libent ut auro antistites.

70           Argenteis scyfis ferunt  
fumare sacrum sanguinem  
auroque nocturnis sacris  
adstare fixos cereos.

75           Tum summa cura est fratribus,  
ut sermo testatur loquax,  
offerre fundis uenditis  
sestertiorum milia.

80           Addicta auorum praedia  
foedis sub auctionibus  
successor exheres gemit  
sanctis egens parentibus.

85           Haec occuluntur abditis  
ecclesiarum in angulis  
et summa pietas creditur  
nudare dulces liberos.

90           Deprome thensauros, malis  
suadendo quos praestrigiis  
exaggeratos obtines,  
nigrante quos claudis specu.

95           Hoc poscit usus publicus,  
hoc fiscus, hoc aerarium,  
ut dedita stipendiis  
ducem iuuat pecunia.

100           Sic dogma uestrum est, audio:  
suum quibusque reddito.  
en, Caesar agnoscit suum  
nomisma nummis inditum.

105           Quod Caesaris scis, Caesari  
da, nempe iustum postulo.  
ni fallor, haud ullam tuus  
signat deus pecuniam,

110           nec, cum ueniret, aureos  
secum Filippas detulit,  
praecepta sed uerbis dedit  
inanis a marsuppio.

115           Inplete dictorum fidem,  
qua uos per orbem uenditis,  
nummos libenter reddite,  
estote uerbis diuites!

110 Nil asperum Laurentius  
refert ad ista aut turbidum,  
sed ut paratus obsequi  
obtemperanter adnuit.

115 'Est diues', inquit, 'non nego,  
habetque nostra ecclesia  
opumque et auri plurimum  
nec quisquam in orbe est ditior.

120 Is ipse tantum non habet  
argenteorum enigmatum  
Augustus arcem possidens,  
cui nummus omnis scribitur.

Sed nec recuso prodere  
locupletis arcam numinis,  
uulgabo cuncta et proferam,  
pretiosa quae Christus tenet.

125 Vnum sed orans flagito:  
indutiarum paululum,  
quo fungar efficacius  
promissionis munere,

130 dum tota digestim mihi  
Christi supellex scribitur;  
nam calculanda primitus,  
tum subnotanda est summula.'

135 Laetus tumescit gaudio  
praefectus ac spem deuorat  
aurum, uelut iam conditum  
domi maneret, gestiens.

140 Pepigere tempus tridui,  
laudatus inde absoluitur  
Laurentius, sponsor sui  
et sponsor ingentis lucri.

Tribus per urbem cursitat  
diebus infirma agmina  
omnesque, qui poscunt stipem,  
cogens in unum et congregans.

145 Illic utrisque obtutibus  
orbes cauatos praeferens  
baculo regebat praeuio  
errore nutantem gradum

150 et claudus infracto genu  
uel crure trunco semipes  
breuiorue planta ex altera  
gressum trahebat inparem.

155 Est, ulcerosis artubus  
qui tabe corrupta fluat,  
est, cuius arens dextera  
neruos in ulnam contrahat.

160 Tales plateis omnibus  
exquirit, adsuetos ali  
ecclesiae matris penu,  
quos ipse promus nouerat.

Recenset exim singulos  
scribens uiritim nomina,  
longo et locatos ordine  
adstare pro templo iubet.

165 Praescriptus et iam fluxerat  
dies: furebat feruidus  
iudex auaro spiritu  
promissa solui efflagitans.

170 Tum martyr: 'Adsistas uelim  
coramque dispositas opes  
mirere, quas noster deus  
praediues in sanctis habet.

175 Videbis ingens atrium  
fulgere uasis aureis  
et per patentis porticus  
structos talentis ordines.'

180 It ille nec pudet sequi.  
uentum ad sacratam ianuam,  
stabant cateruae pauperum  
inculta uisu examina.

Fragor rogantum tollitur,  
praefectus horrescit stupens,  
conuersus in Laurentium  
oculisque turbatis minax.

185 Contra ille: 'Quid frendens', ait,  
'minitaris aut quid displicet?  
num sordida haec aut uilia,  
num dispuenda existimas?

190           Aurum, quod ardentem sitis,  
effusa gignunt rudera  
et de metallis squalidis  
poenalis excudit labor,

                  torrens uel amnis turbidis  
uoluens harenis implicat;  
195           quod terrulentum ac sordidum  
flammis necesse est decoqui.

                  Pudor per aurum soluitur,  
uiolatur auro integritas,  
pax occidit, fides perit,  
200           leges et ipsae intercidunt.

                  Quid tu uenenum gloriae  
extollis et magni putas?  
si quaeris aurum uerius,  
lux est et humanum genus.

205           Hi sunt alumni luminis,  
quos corpus artat debile,  
ne per salutem uiscerum  
mens insolescat turgida.

                  Cum membra morbus dissicit,  
210           animus uiget robustior,  
membris uicissim fortibus  
uis sauciatu sensuum.

                  Nam sanguis in culpam calens  
minus ministrat uirium,  
215           si feruor effectus malis  
elumbe uirus contrahat.

                  Si forte detur optio,  
malim dolore asperrimo  
fragmenta membrorum pati  
220           et pulcher intus uiuere.

                  Committe formas pestium  
et confer alternas lues:  
carnisne morbus foedior,  
an mentis et morum ulcera?

225           Nostris per artus debiles  
intus decoris integri  
sensum uenusti innoxium  
laboris expertes gerunt,



230            uestros ualentes corpore  
interna corrumpit lepra  
errorque mancum claudicat  
et caeca fraus nihil uidet.

235            Quemuis tuorum principum,  
qui ueste et ore praenitent,  
magis probabo debilem,  
quam quis meorum est pauperum.

240            Hunc, qui superbit serico,  
quem currus inflatum uehit,  
hydrops aquosus lucido  
tendit ueneno intrinsecus.

              Ast hic auarus contrahit  
manus recuruas et uolam  
plicans aduncis unguibus  
laxare neruos non ualet.

245            Istum libido faetida  
per scorta tractum publica  
luto et cloacis inquinat,  
dum spurca mendicat stupra.

250            Quid? ille feruens ambitu  
sitimque honoris aestuans  
mersisne anhelat febribus  
atque igne uenarum furit?

255            Quisquis tacendi intemperans  
silenda prurit prodere,  
uexatur et scalpit iecur  
scabiemque cordis sustinet.

260            Quid inuidorum pectorum  
strumas retexam turgidas,  
quid purulenta et liuida  
malignitatum uulnera?

              Tute ipse, qui Romam regis,  
contemptor aeterni dei,  
dum daemonum sordes colis,  
morbo laboras regio.

265            Hi, quos superbus despicias,  
quos execrandos iudicas,  
breui ulcerosos exuent  
artus et incolumes erunt,

270 cum carne corruptissima  
tandem soluti ac liberi  
pulcherrimo uitae statu  
in arce lucebunt patris,

non sordidati aut debiles,  
sicut uidentur interim,  
275 sed purpurantibus stolis  
clari et coronis aureis.

Tunc, si facultas subpetat,  
coram tuis obtutibus  
istos potentes saeculi  
280 uelim recensendos dari.

Pannis uideres obsitos  
et mucculentis naribus,  
mentum saliuus uuidum  
lipposque palfebra putri.

285 Peccante nil est taetrius,  
nil tam leprosum aut putidum,  
cruda est cicatrix criminum  
oletque ut antrum tartari.

290 Animabus inuersa uice  
corrupta forma infligitur,  
quas pulcher aspectus prius  
in corpore oblectauerat.

En ergo nummos aureos,  
quos proxime spoponderam,  
295 quos nec fauillis obruat  
ruina nec fur subtrahat.

Nunc addo gemmas nobiles,  
ne pauperem Christum putes,  
gemmas corusci luminis,  
300 ornatur hoc templum quibus.

Cernis sacratas uirgines,  
miraris intactas anus  
primique post damnum tori  
ignis secundi nescias.

305 Hoc est monile ecclesiae,  
his illa gemmis comitur,  
dotata sic Christo placet,  
sic ornat altum uerticem.

310           Eccum talenta, suscipe,  
ornabis urbem Romulam,  
ditabis et rem principis,  
fies et ipse ditior.'

          'Ridemur', exclamat furens  
315       praefectus, 'et miris modis  
per tot figuras ludimur,  
et uiuit insanum caput!

          Inpune tantas, furcifer,  
320       strofas cauillo mimico  
te nexuisse existimas,  
dum scurra saltas fabulam?

          Concinna uisa urbanitas  
tractare nosmet ludicris,  
325       egon cachinnis uenditus  
acroma festiuum fui?

325           Adeone nulla austeritas,  
censura nulla est fascibus,  
adeon securem publicam  
mollis retudit lenitas?

330           Dicis: 'Libenter oppetam,  
uotiuua mors est martyri'—  
est ista uobis, nouimus,  
persuasionis uanitas—;

          sed non uolenti inpertiam,  
335       praestetur et mortis citae  
conpendiosus exitus,  
perire raptim non dabo.

          Vitam tenebo et differam  
340       poenis morarum iugibus,  
et mors inextricabilis  
longos dolores protrahet.

          Prunas tepentes sternite,  
ne feruor ignitus nimis  
os contumacis occupet  
345       et cordis intret abdita.

345           Vapor senescens langueat,  
qui fusus adflatu leui  
tormenta sensim temperet  
semustulati corporis.

350 Bene est, quod ipse ex omnibus  
mysteriarches incidit,  
hic solus exemplum dabit,  
quid mox timere debeant.

355 Conscende constratum rogum,  
decumbe digno lectulo,  
tunc, si libebit, disputa  
nil esse Vulcanum meum!

360 Haec fante praefecto truces  
hinc inde tortores parant  
nudare amictu martyrem,  
uincire membra et tendere.

365 Illi os decore splenduit  
fulgorque circumfusus est;  
talem reuertens legifer  
de monte uultum detulit,

370 Iudaea quem plebs aureo  
boue inquinata et decolor  
expauit et faciem retro  
detorsit inpatiens dei.

375 Talemque et ille praetulit  
oris corusci gloriam  
Stefanus per imbrem saxeum  
caelos apertos intuens.

380 Inluminatum hoc eminus  
recens piatis fratribus,  
baptisma quos nuper datum  
Christi capaces fecerat;

385 ast inpiorum caecitas,  
os oblitum noctis situ  
nigrante sub uelamine  
obducta clarum non uidet,

Aegyptiae plagae in modum,  
quae, cum tenebris barbaros  
damnaret, Hebraeis diem  
suo exhibebat lumine.

390 Quin ipsa odoris qualitas,  
adusta quam reddit cutis,  
diuersa utrosque permouet:  
his nidor, illis nectar est.

Idemque sensus dispari  
390 uariatus aura aut adficit  
horrore nares uindice  
aut mulcet oblectamine.

Sic ignis aeternus deus,  
nam Christus ignis uerus est;  
395 is ipse complet lumine  
iustos et urit noxios.

Postquam uapor diutinus  
decoxit exustum latus,  
ultro e catasta iudicem  
400 conpellat adfatu breui:

‘Conuerte partem corporis  
satis crematam iugiter  
et fac periculum, quid tuus  
Vulcanus ardens egerit.’

Praefectus inuerti iubet,  
405 tunc ille: ‘Coctum est, deuora  
et experimentum cape,  
sit crudum an assum suauius!’

Haec ludibundus dixerat,  
410 caelum deinde suspicit  
et congemescens obsecrat  
miseratus urbem Romulam:

‘O Christe, nomen unicum,  
o splendor, o uirtus patris,  
415 o factor orbis et poli  
atque auctor horum moenium,

qui scepra Romae in uertice  
rerum locasti, sanciens  
mundum Quirinali togae  
420 seruire et armis cedere,

ut discrepantum gentium  
mores et obseruantiam  
linguasque et ingenia et sacra  
unis domares legibus!

En omne sub regnum Remi  
425 mortale concessit genus,  
idem loquuntur dissoni  
ritus, id ipsum sentiunt.

Hoc destinatum, quo magis  
430 ius christiani nominis,  
quodcumque terrarum iacet,  
uno inligaret uinculo.

Da, Christe, Romanis tuis,  
sit christiana ut ciuitas,  
435 per quam dedisti, ut ceteris  
mens una sacrorum foret!

Confoederantur omnia  
hinc inde membra in symbolum,  
mansuescit orbis subditus,  
440 mansuescat et summum caput.

Aduertat abiunctas plagas  
coire in unam gratiam,  
fiat fidelis Romulus  
et ipse iam credat Numa.

445 Confundit error Troicus  
adhuc Catonum curiam  
ueneratus occultis focis  
Frygum penates exules.

Ianum bifrontem et Sterculum  
450 colit senatus, horreo  
tot monstra patrum dicere  
et festa Saturni senis.

Absterge, Christe, hoc dedecus,  
emitte Gabriel tuum,  
455 agnoscat ut uerum deum  
errans Æuli caecitas!

Et iam tenemus obsides  
fidissimos huius spei,  
hic nempe iam regnant duo  
460 apostolorum principes,

alter uocator gentium,  
alter cathedram possidens  
primam recludit creditas  
aeternitatis ianuas.

465 Discede, adulter Iuppiter,  
stupro sororis oblite,  
relinque Romam liberam  
plebemque iam Christi fuge!

470 Te Paulus hinc exterminat,  
te sanguis exturbat Petri,  
tibi id, quod ipse armaueras,  
factum Neronis, officit.

475 Video futurum principem  
quandoque, qui seruus dei  
taetris sacrorum sordibus  
seruire Romam non sinat,

480 qui templa claudat uectibus,  
ualuas eburnas obstruat,  
nefasta damnet limina  
obdens aënos pessulos.

Tunc pura ab omni sanguine  
tandem nitebunt marmora,  
stabunt et aera innoxia,  
quae nunc habentur idola.'

485 Hic finis orandi fuit  
et finis idem uinculi  
carnalis: erupit uolens  
uocem secutus spiritus.

490 Vexere corpus subditis  
ceruicibus quidam patres,  
quos mira libertas uiri  
ambire Christum suaserat.

495 Repens medullas indoles  
adflarat et coegerat  
amore sublimis dei  
odisse nugas pristinas.

500 Refrigit ex illo die  
cultus deorum turpium:  
plebs in sacellis rarior,  
Christi ad tribunal curritur.

Sic dimicans Laurentius  
non ense praecinxit latus,  
hostile sed ferrum retro  
torquens in auctorem tulit.

505 Dum daemon inuictum dei  
testem laccessit proelio,  
perfossus ipse concidit  
et stratus aeternum iacet.

510 Mors illa sancti martyris  
mors uera templorum fuit,  
tunc Vesta Palladios lares  
inpune sensit deseri.

515 Quidquid Quiritum sueuerat  
orare simpuium Numae,  
Christi frequentans atria  
hymnis resultat martyrem.

520 Ipsa et senatus lumina,  
quondam luperci aut flamines,  
apostolorum et martyrum  
exosculantur et limina.

Videmus inlustres domos,  
sexu ex utroque nobiles,  
offerre uotis pignera  
clarissimorum liberum.

525 Vittatus olim pontifex  
adscitur in signum crucis  
aedemque, Laurenti, tuam  
Vestalis intrat Claudia.

530 O ter quaterque et septies  
beatus urbis incola,  
qui te ac tuorum comminus  
sedem celebrat ossuum,

535 cui propter aduolui licet,  
qui fletibus spargit locum,  
qui pectus in terram premit,  
qui uota fundit murmure!

540 Nos Vasco Hiberus diuidit  
binis remotos Alpibus  
trans Cottianorum iuga  
trans et Pyrenas ninguidos.

Vix fama nota est, abditis  
quam plena sanctis Roma sit,  
quam diues urbanum solum  
sacris sepulcris floreat.

545 Sed qui caremus his bonis  
nec sanguinis uestigia  
uidere coram possumus,  
caelum intuemur eminus.



550 Sic, sancte Laurenti, tuam  
nos passionem quaerimus,  
est aula nam duplex tibi,  
hic corporis, mentis polo.

555 Illic inenarrabili  
allectus urbi municeps  
aeternae in arce curiae  
gestas coronam ciuicam.

560 Videor uidere inlustribus  
gemmis coruscantem uirum,  
quem Roma caelestis sibi  
legit perennem consulem.

Quae sit potestas credita  
et muneris quantum datum,  
probant Quiritum gaudia,  
quibus rogatus adnuis.

565 Quod quisque supplex postulat,  
fert inpetratum prospere,  
poscunt, iocantur, indicant,  
et tristis haut ullus redit,

570 ceu praesto semper adsies  
tuosque alumnos urbicos  
lactante complexus sinu  
paterno amore nutrias.

575 Hos inter, o Christi decus,  
audi poetam rusticum,  
cordis fatentem crimina  
et facta prodentem sua.

580 Indignus agnosco et scio,  
quem Christus ipse exaudiat,  
sed per patronos martyras  
potest medellam consequi.

Audi benignus supplicem  
Christi reum Prudentium  
et seruientem corpori  
absolue uinclis saeculi!



# III

## HYMNUS IN HONOREM PASSIONIS EULALIAE, BEATISSIMAE MARTYRIS.

5           Germine nobilis Eulalia  
          mortis et indole nobilior  
          Emeritam sacra uirgo suam,  
          cuius ab ubere progenita est,  
          ossibus ornat, amore colit.

10           Proximus occiduo locus est,  
          qui tulit hoc decus egregium,  
          urbe potens, populis locuples,  
          sed mage sanguine martyrii  
          uirgineoque potens titulo.

15           Curculis tribus atque nouem  
          tris hiemes quater adtigerat,  
          cum crepitante pyra trepidos  
          terruiit aspera carnifices  
          supplicium sibi dulce rata.

20           Iam dederat prius indicium  
          tendere se patris ad solium  
          nec sua membra dicata toro:  
          ipsa crepundia reppulerat  
          ludere nescia pusiola;

25           spernere sucina, flere rosas,  
          fulua monilia respuere,  
          ore seuera, modesta gradu,  
          moribus et nimium teneris  
          canitiem meditata senum.

30           Ast ubi se furiata luis  
          excitat in famulos domini  
          christicolasque cruenta iubet  
          tura cremare, iecur pecudis  
          mortiferis adolere deis,

infremuit sacer Eulaliae  
spiritus ingenique ferox  
turbida frangere bella parat  
et rude pectus anhela deo  
35 femina prouocat arma uirum.

Sed pia cura parentis agit,  
uirgo animosa domi ut lateat  
abdita rure et ab urbe procul,  
ne fera sanguinis in pretium  
40 mortis amore puella ruat.

Illa perosa quietis opem  
degeneri tolerare mora  
nocte fores sine teste mouet  
saeptaque claustra fugax aperit,  
45 inde per inuia carpit iter.

Ingreditur pedibus laceris  
per loca senta situ et uepribus  
angelico comitata choro  
et, licet horrida nox sileat,  
50 lucis habet tamen illa ducem.

Sic habuit generosa patrum  
turba columniferum radium,  
scindere qui tenebrosa potens  
nocte uiam face perspicua  
55 praestitit intereunte chao.

Non aliter pia uirgo uiam  
nocte secuta diem meruit  
nec tenebris adoperta fuit  
regna Canopica cum fugeret  
60 et super astra pararet iter.

Illa gradu cita peruigili  
milia multa prius peragit,  
quam plaga pandat Eoa polum;  
mane superba tribunal adit  
65 fascibus adstat et in mediis

uociferans: 'Rogo, quis furor est  
perdere praecipites animas  
et male prodiga corda sui  
sternere rasilibus scopulis  
70 omnipatremque negare deum?

Quaeritis, o miseranda manus,  
christicolum genus? En ego sum  
daemonicis inimica sacris,  
idola protero sub pedibus,  
75 pectore et ore deum fateor.

Isis, Apollo, Venus nihil est,  
Maximianus et ipse nihil,  
illa nihil, quia facta manu,  
hic, manuum quia facta colit,  
80 friuula utraque et utraque nihil.

Maximianus, opum dominus  
et tamen ipse cliens lapidum,  
prostituat uoueatque suis  
numinibus caput ipse suum,  
85 pectora cur generosa quatit?

Dux bonus, arbiter egregius,  
sanguine pascitur innocuo  
corporibusque piis inhians  
uiscera sobria dilacerat  
90 gaudet et excruciare fidem.

Ergo age, tortor, adure, seca,  
diuide membra coacta luto!  
soluere rem fragilem facile est,  
non penetrabitur interior  
95 exagitante dolore animus.'

Talibus excitus in furias  
praetor ait: 'Rape praecipitem,  
lictor, et obrue suppliciis!  
sentiat esse deos patrios  
100 nec leue principis imperium.

Quam cuperem tamen ante necem,  
si potis est, reuocare tuam,  
torua puellula, nequitiam!  
respice, gaudia quanta metas,  
105 quae tibi fert genialis honor!

Te lacrimis labefacta domus  
prosequitur generisque tui  
ingemit anxia nobilitas,  
sole quod occidis in tenero  
110 proxima dotibus et thalamis.

Non mouet aurea pompa tori,  
non pietas ueneranda senum,  
quos temeraria debilitas?  
ecce parata ministeria  
115 excruciables exitii:

aut gladio feriere caput  
aut laniabere membra feris  
aut facibus data fumificis  
flebiliterque ululanda tuis  
120 in cineres resoluta flues.

Haec, rogo, quis labor est fugere?  
si modicum salis eminulis  
turis et exiguum digitis  
tangere, uirgo, benigna uelis,  
125 poena grauis procul afuerit.'

Martyr ad ista nihil, sed enim  
infremit inque tyranni oculos  
sputa iacit, simulacra dehinc  
dissipat inpositamque molam  
130 turibulis pede prosubigit.

Nec mora, carnifices gemini  
iuncea pectora dilacerant  
et latus ungula uirgineum  
pulsat utrimque et ad ossa secat  
135 Eulalia numerante notas.

'Scriberis ecce mihi, domine,  
quam iuuat hos apices legere,  
qui tua, Christe, tropea notant,  
nomen et ipsa sacrum loquitur  
140 purpura sanguinis eliciti.'

Haec sine fletibus et gemitu  
laeta canebat et intrepida,  
dirus abest dolor ex animo  
membraque picta cruore nouo  
145 fonte cutem recalente lauant.

Vltima carnificina dehinc:  
non laceratio uulnifica  
crate tenuis nec arata cutis,  
flamma sed undique lampadibus  
150 in latera stomachumque furit.

155 Crinis odor ut in iugulos  
fluxerat inuolitans umeris,  
quo pudibunda pudicitia  
uirgineusque lateret honos  
tegmine uerticis opposito,

160 flamma crepans uolat in faciem  
perque comas uegetata caput  
occupat exsuperatque apicem,  
uirgo citum cupiens obitum  
adpetit et bibit ore rogam.

165 Emicat inde columba repens  
martyris os niue candidior  
uisa relinquere et astra sequi;  
spiritus hic erat Eulaliae  
lacteolus, celer, innocuus.

170 Colla fluunt abeunte anima  
et rogos igneus emoritur,  
pax datur artibus exanimis,  
flatus in aethere plaudit ouans  
templaque celsa petit uolucer.

175 Vidit et ipse satelles auem  
feminae ab ore meare palam,  
obstupefactus et adtonitus  
prosilit et sua gesta fugit,  
lictor et ipse fugit pauidus.

180 Ecce niuem glacialis hiems  
ingerit et tegit omne forum,  
membra tegit simul Eulaliae  
axe iacentia sub gelido  
pallioli uice linteoli.

185 Cedat amor lacrimantum hominum,  
qui celebrare suprema solent,  
flebile cedat et officium:  
ipsa elementa iubente deo  
exequias tibi, uirgo, ferunt.

190 Nunc locus Emerita est tumulo,  
clara colonia Vettoniae,  
quam memorabilis amnis Ana  
praeterit et uiridante rapax  
gurgite moenia pulchra lauit.

Hic, ubi marmore perspicuo  
atria luminat alma nitor  
et peregrinus et indigena,  
reliquias cineresque sacros  
195 seruat humus ueneranda sinu.

Tecta corusca super rutilant  
de laquearibus aureolis  
saxaque caesa solum uariant,  
floribus ut rosulenta putes  
200 prata rubescere multimodis.

Carpite purpureas uiolas  
sanguineosque crocos metite!  
non caret his genialis hiems,  
laxat et arua tepens glacies,  
205 floribus ut cumulet calathos.

Ista comantibus e foliis  
munera, uirgo puerque, date!  
ast egoserta choro in medio  
texta feram pede dactylico,  
210 uilia, marcida, festa tamen.

Sic uenerarier ossa libet  
ossibus altar et inpositum,  
illa dei sita sub pedibus  
prospicit haec populosque suos  
215 carmine propitiata fouet.



# IV HYMNUS IN HONOREM SANCTORUM DECEM ET OCTO CAESARAUGUSTANORUM

Bis nouem noster populus sub uno  
martyrum seruat cineres sepulcro,  
Caesaraugustam uocitamus urbem,  
res cui tanta est.

5 Plena magnorum domus angelorum  
non timet mundi fragilis ruinam  
tot sinu gestans simul offerenda  
munera Christo.

10 Cum deus dextram quatiens coruscam  
nube subnixus ueniet rubente  
gentibus iustam positurus aequo  
pondere libram,

15 orbe de magno caput excitata  
obuiam Christo properanter ibit  
ciuitas quaeque pretiosa portans  
dona canistris.

20 Afra Carthago tua promet ossa,  
ore facundo Cypriane doctor,  
Corduba Acisclum dabit et Zoëllum  
tresque coronas.

Tu tribus gemmis diadema pulchrum  
offeres Christo, genetrix piorum  
Tarraco, intexit cui Fructuosus  
sutile uinclum.

25 Nomen hoc gemmae strofio inligatae est,  
emicant iuxta lapides gemelli  
ardet et splendor parilis duorum  
igne corusco.

30 Parua Felicis decus exhibebit  
artubus sanctis locuples Gerunda,  
nostra gestabit Calagurris ambos,  
quos ueneramur.

35 Barchinon claro Cucufate freta  
surget et Paulo speciosa Narbo,  
teque praepollens Arelas habebit,  
sancte Genesi.

40 Lusitanorum caput oppidorum  
urbs adoratae cineres puellae  
obuiam Christo rapiens ad aram  
porriget ipsam.

Sanguinem Iusti, cui Pastor haeret,  
ferculum duplex geminumque donum  
ferre Conplutum gremio iuuabit  
membra duorum.

45 Ingeret Tingis sua Cassianum,  
festa Massylum monumenta regum,  
qui cinis gentes domitas coegit  
ad iuga Christi.

50 Singulis paucae, tribus aut duobus,  
forsan et quinis aliquae placebunt  
testibus Christi prius hostiarum  
pignere functae.

55 Tu decem sanctos reuehes et octo  
Caesaraugusta studiosa Christo,  
uerticem flauis oleis reuineta,  
pacis honore.

60 Sola in occursum numerosiores  
martyrum turbas domino parasti,  
sola praediues pietate multa  
luce frueris.

Vix parens orbis populosa Poeni,  
ipsa uix Roma in solio locata  
te, decus nostrum, superare in isto  
munere digna est.

65 Omnibus portis sacer inmolatus  
sanguis exclusit genus inuidorum  
daemonum et nigras pepulit tenebras  
urbe piata.

70 Nullus umbrarum latet intus horror;  
pulsam nam pestis populum refugit,  
Christus in totis habitat plateis,  
Christus ubique est.

75 Martyrum credas patriam coronis  
debitam sacris, chorus unde surgens  
tendit in caelum niueus togatae  
nobilitatis.

80 Inde, Vincenti, tua palma nata est,  
clerus hic tantum peperit triumphum,  
hic sacerdotum domus infulata  
Valeriorum.

Saeuus antiquis quotiens procellis  
turbo uexatum tremefecit orbem,  
tristior templum rabies in istud  
intulit iras.

85 Nec furor quisquam sine laude nostrum  
cessit aut clari uacuum cruoris,  
martyrum semper numerus sub omni  
grandine creuit.

90 Nonne, Vincenti, peregrini necandus  
martyr his terris tenui notasti  
sanguinis rore speciem futuri  
morte propinqua?

95 Hoc colunt ciues, uelut ipsa membra  
caespes includat suos et paterno  
seruet amplectens tumulo beati  
martyris ossa.

100 Noster est, quamuis procul hinc in urbe  
passus ignota dederit sepulcri  
gloriam uictor prope litus altae  
forte Sagynti.

Noster et nostra puer in palestra  
arte uirtutis fideique oliuo  
unctus horrendum didicit domare  
uiribus hostem.

105 Nouerat templo celebres in isto  
octies partas deciesque palmas,  
laureis doctus patriis eadem  
laude cucurrit.

110 Hic et, Encrati, recubant tuarum  
ossa uirtutum, quibus efferati  
spiritum mundi, uiolenta uirgo,  
dedecorasti.

115 Martyrum nulli remanente uita  
contigit terris habitare nostris,  
sola tu morti propriae superstes  
uiuus in orbe.

120 Viuis ac poenae seriem retexis  
carnis et caesae spoliū retentans,  
taetra quam sulcos habeant amarus  
uulnera, narras.

Barbarus tortor latus omne carpsit,  
sanguis inpensus, lacerata membra,  
pectus abscisa patuit papilla  
corde sub ipso.

125 Iam minus mortis pretium peractae est,  
quae uenenatos abolens dolores  
concitam membris tribuit quietem  
fine soporo.

130 Cruda te longum tenuit cicatrix  
et diu uenis dolor haesit ardens,  
dum putrescentes tenuat medullas  
tabidus umor.

135 Inuidus quamuis obitum supremum  
persecutoris gladius negarit,  
plena te, martyr, tamen ut peremptam  
poena coronat.

140 Vidimus partem iecoris reuulsam  
ungulis longe iacuisse pressis,  
mors habet pallens aliquid tuorum  
te quoque uiua.

Hunc nouum nostrae titulum fruendum  
Caesaraugustae dedit ipse Christus,  
iuge uiuentis domus ut dicata  
martyris esset.

145 Ergo ter senis sacra candidatis  
diues Optato simul et Luperco  
perge conscriptum tibi met senatum  
pangere psalmis!

150 Ede Successum, cane Martialem!  
mors et Urbani tibi concinatur,  
Iuliam cantus resonet simulque  
Quintilianum.

Publium pangat chorus et reuoluat,  
quale Frontonis fuerit tropaeum,  
155 quid bonus Felix tulerit, quid acer  
Caecilianus,

quantus, Euoti, tua bella sanguis  
tinxerit, quantus tua, Primitiue,  
tum tuos uiuax recolat triumphos  
160 laus, Apodemi.

Quattuor posthinc superest uirorum  
nomen extolli renuente metro,  
quos Saturninos memorat uocatos  
prisca uetustas.

165 Carminis leges amor aureorum  
nominum parui facit et loquendi  
cura de sanctis uitiosa non est  
nec rudis umquam.

Plenus est artis modus adnotatas  
170 nominum formas recitare Christo,  
quas tenet caeli liber explicandus  
tempore iusto.

Octo tunc sanctos recolet decemque  
angelus coram patre filioque  
175 urbis unius regimen tenentes  
iure sepulcri.

Quin ad antiquum numerum trahetur  
uiua post poenae specimen puella  
morsque Vincenti, cui sanguis hinc est  
180 fons et honoris

[additis Gaio—nec enim silendi—  
teque, Crementi, quibus incruentum  
ferre prouenit decus ex secundo  
laudis agone.

185 Ambo confessi dominum steterunt  
acriter contra fremitum latronum,  
ambo gustarunt leuiter saporem  
martyriorum].

190 Haec sub altari sita sempiterno  
lapsibus nostris ueniam precatur  
turba, quam seruat procerum creatrix  
purpureorum.

195 Nos pio fletu, date, perluamus  
marmorum sulcos, quibus est operta  
spes, ut absoluam retinaculorum  
uincla meorum.

200 Sterne te totam generosa sanctis  
ciuitas mecum tumulis, deinde  
mox resurgentes animas et artus  
tota sequeris.

# V PASSIO SANCTI VINCENTI MARTYRIS

Beate martyr, prospera  
diem triumphalem tuum,  
quo sanguinis merces tibi  
corona, Vincenti, datur!

5           Hic te ex tenebris saeculi  
tortore uicto et iudice  
euexit ad caelum dies  
Christoque ouantem reddidit.

10           Nunc angelorum particeps  
conlucis insigni stola,  
quam testis indomabilis  
riuis cruoris laueras,

15           cum te satelles idoli  
praecinctus atris legibus  
litare diuis gentium  
ferro et catenis cogeret.

20           Ac uerba primum mollia  
suadendo blande effuderat,  
captator ut uitulum lupus  
rapturus adludit prius.

          'Rex', inquit, 'orbis maximus,  
qui sceptrum gestat publica,  
seruire sanxit omnia  
priscis deorum cultibus.

25           Vos, Nazareni, adsistite  
rudemque ritum spernite!  
haec saxa, quae princeps colit,  
placate fumo et uictima!

30           Exclamat hic Vincentius,  
leuuita de tribu sacra,  
minister altaris dei  
septem ex columnis lacteis:

35           ‘Tibi ista praesint numina,  
tu saxa, tu lignum colas,  
tu mortuorum mortuus  
fias deorum pontifex,

          nos lucis auctorem patrem  
          eiusque Christum filium,  
          qui solus ac uerus deus,  
40       Datiane, confitebimur.’

          Hic ille iam commotior:  
          ‘Audesne, non felix’, ait,  
          ‘ius hoc deorum et principum  
          uiolare uerbis asperis,

45           ius et sacratum et publicum,  
          cui cedit humanum genus,  
          nec te iuuentae feruidae  
          instans periculum permouet?

          Hoc namque decretum cape:  
50       aut ara ture et caespite  
          precanda iam nunc est tibi  
          aut mors luenda est sanguine.’

          Respondit ille altrinsecus:  
          ‘Age ergo, quidquid uirium,  
55       quidquid potestatis tibi est,  
          palam reluctor, exere!

          Vox nostra quae sit, accipe:  
          est Christus et pater deus,  
          serui huius et testes sumus,  
60       extorque, si potes, fidem!

          Tormenta, carcer, unguulae  
          stridensque flammis lammina  
          atque ipsa poenarum ultima,  
          mors, christianis ludus est.

65           O uestra inanis uanitas  
          scitumque brutum Caesaris!  
          condigna uestris sensibus  
          coli iubetis numina:

          excisa fabrili manu  
70       cauis recocta et follibus,  
          quae uoce, quae gressu carent,  
          inmota, caeca, elingua.



75 His sumptuosa splendido  
delubra crescunt marmore,  
his colla mugientium  
percussa taurorum cadunt.

'At sunt et illic spiritus.'  
'Sunt, sed magistri criminum  
80 uestrae et salutis aucipes,  
uagi, inpotentes, sordidi,

qui uos latenter incitos  
in omne compellunt nefas:  
uastare iustos caedibus,  
plebem piorum carpere.

85 Norunt et ipsi ac sentiunt  
pollere Christum et uiuere  
eiusque iam iamque adfore  
regnum tremendum perfidis.

90 Clamant fatentes denique  
pulsus ex latebris uiscerum  
uirtute Christi et nomine  
diuique et idem daemones.'

95 His intonantem martyrem  
iudex profanus non tulit,  
conclamat: 'Os obtrudite,  
ne plura iactet improbus!

Vocem loquentis claudite  
raptimque lictores date,  
illos reorum Plutones  
100 pastos resectis carnibus!

Iam faxo ius praetorium  
conuiciator sentiat,  
inpune ne nostris sibi  
dis destruendis luserit.

105 Tibi ergo soli, contumax,  
Tarpeia calcantur sacra,  
tu porro solus obteras  
Romam, senatum, Caesarem?

110 Vinctum retortis brachiis  
sursum ac deorsum extendite,  
compago donec ossuum  
diuulsa membratim crepet.

Posthinc hiulcis ictibus  
nudate costarum abdita,  
115 ut per latebras uulnerum  
iecur resectum palpitet.'

Ridebat haec miles dei  
manus cruentas increpans,  
quod fixa non profundius  
120 intraret artus ungula.

Ac iam omne robur fortium  
euiscerando cesserat  
nisusque anhelus soluerat  
fessos lacertorum toros,

125 ast ille tanto laetior  
omni uacantem nubilo  
frontem serenam lumnat  
te, Christe, praesentem uidens.

'Quis uultus iste, pro pudor!'  
130 Datianus aiebat furens,  
'gaudet, renidet, prouocat  
tortore tortus acrior!

Nil illa uis exercita  
tot noxiorum mortibus  
135 agone in isto proficit,  
ars et dolorum uincitur.

Sed uos, alumni carceris,  
par semper inuictum mihi,  
cohibete paulum dexteris,  
140 respiret ut lassus uigor.

Praesicca rursus ulcera,  
dum se cicatrix colligit  
refrigerati sanguinis,  
manus resulcans diruet.'

145 His contra leuuitas refert:  
'Si iam tuorum perspicias  
languere uirtutem canum,  
age, ipse maior carnifex,

ostende, quo pacto queant  
150 imos recessus scindere,  
manus et ipse intersere  
riuosque feruentes bibe!

Erras, cruenta, si meam  
te rere poenam sumere,  
155 cum membra morti obnoxia  
dilancinata interficis.

Est alter, est intrinsecus,  
uiolare quem nullus potest,  
160 liber, quietus, integer,  
excors dolorum tristium.

Hoc, quod laboras perdere  
tantis furoris uiribus,  
uas est solutum ac fictile,  
165 quocumque frangendum modo.

Quin immo nunc enitere  
illum secare ac plectere,  
qui perstat intus, qui tuam  
170 calcat, tyranne, insaniam!

Hunc, hunc lacesse, hunc discute,  
175 inuictum, inexsuperabilem,  
nullis procellis subditum  
solique subiectum deo!

Haec fatur et stridentibus  
175 laniatur uncis denuo;  
cui praetor ore subdolo  
anguina uerba exsibilat:

'Si tanta callum pectoris  
praedurat obstinatio,  
180 puluinar ut nostrum manu  
abomineris tangere,

saltim latentes paginas  
librosque opertos detege,  
quo secta prauum seminans  
185 iustis cremetur ignibus.'

His martyr auditis ait:  
185 'Quem tu, maligne, mysticis  
minitaris ignem litteris,  
flagrabis ipse hoc iustius.

Romfea nam caelestium  
190 uindex erit uoluminum  
tanti ueneni interpretem  
linguam perurens fulmine.

Vides fauillas indices  
Gomorreorum criminum,  
195 Sodomita nec latet cinis  
testis perennis funeris.

Exemplar hoc, serpens, tuum est,  
fuligo quem mox sulphuris  
bitumen et mixtum pice  
200 imo implicabunt tartaro.'

His persecutor saucius  
pallet, rubescit, aestuat  
insana torquens lumina  
spumasque frendens egerit.

205 Tum deinde cunctatus diu  
decernit: 'Extrema omnium  
igni, grabato et lamminis  
exerceatur quaestio.'

Haec ille sese ad munera  
210 gradu citato proripit  
ipsosque pernix gaudio  
poenae ministros praeuenit.

Ventum ad palestram gloriae,  
spes certat et crudelitas,  
215 luctamen anceps conserunt  
hinc martyr, illinc carnifex.

Serrata lectum regula  
dente infrequenti exasperat,  
cui multa carbonum strues  
220 uiuum uaporat halitum.

Hunc sponte conscendit rogum  
uir sanctus ore interrito,  
ceum iam coronae conscius  
celsum tribunal scanderet.

225 Subter crepante aspergine  
scintillat excussus salis  
punctisque feruens stridulis  
sparsim per artus figitur.

Aruina posthinc igneum  
230 inpressa cauterem lauit,  
uis unde roris fumidi  
in membra sensim liquitur.

Haec inter inmotus manet  
tamquam dolorum nescius  
235 tenditque in altum lumina;  
nam uincla palmas presserant.

Sublatus inde fortior  
lugubre in antrum truditur,  
ne liber usus luminis  
240 animaret altum spiritum.

Est intus imo ergastulo  
locus tenebris nigrior,  
quem saxa mersi fornicis  
angusta clausum strangulant.

245 Aeterna nox illic latet  
expers diurni sideris,  
hic carcer horrendus suos  
habere fertur inferos.

In hoc baratrum conicit  
250 truculentus hostis martyrem  
lignoque plantas inserit  
diuaricatis cruribus.

Quin addit et poenam nouam  
crucis peritus artifex,  
255 nulli tyranno cognitam  
nec fando conpertam retro.

Fragmenta testarum iubet  
hyrta inpolitibus angulis,  
acuminata, informia,  
260 tergo iacentis sternerent.

Totum cubile spiculis  
armant dolores anxii,  
insomne qui subter latus  
mucrone pulsant obuio.

265 Haec ille uersutus uafra  
meditatus arte struxerat,  
sed Belzebulis callida  
commenta Christus destruit.

Nam carceralis caecitas  
270 splendore lucis fulgurat  
duplexque morsus stipitis  
ruptis cauernis dissilit

275           Agnoscit hic Vincentius  
          adesse quod sperauerat,  
          tanti laboris praemium,  
          Christum, datorem luminis.

          Cernit deinde fragmina  
          iam testularum mollibus  
          uestire semet floribus  
280           redolente nectar carcere.

          Quin et frequentes angeli  
          stant ac loquuntur comminus,  
          quorum unus ore augustior  
          compellat his dictis uirum:

285           ‘Exsurge, martyr inclyte,  
          exsurge securus tui,  
          exsurge et almis coetibus  
          noster sodalis addere!

          Decursa iam satis tibi  
290           poenae minacis munia  
          pulchroque mortis exitu  
          omnis peracta est passio.

          O miles inuictissime,  
295           fortissimorum fortior,  
          iam te ipsa saeua et aspera  
          tormenta uictorem tremunt.

          Spectator haec Christus deus  
          compensat aeuo intermino  
          propriaeque collegam crucis  
300           larga coronat dextera.

          Pone hoc caducum uasculum  
          conpage textum terrea,  
          quod dissipatum soluitur,  
          et liber in caelum ueni!’

305           Haec ille; sed clausas fores  
          interna rumpunt lumina  
          tenuisque per rimas nitor  
          lucis latentis proditur.

          Hoc cum stuperet territus  
310           obsessor atri liminis,  
          quem cura pernox manserat  
          seruare feralem domum,

315 psallentis audit insuper  
praedulce carmen martyris,  
cui uocis instar aemulae  
conclauē reddit concauum.

320 Pauens deinde introspicit,  
admota quantum postibus  
acies per artas cardinum  
intrare iuncturas potest:

uernare multis floribus  
stramenta testarum uidet  
ipsumque uulsis nexibus  
obambulantem pangere.

325 Implentur aures turbidi  
praetoris hoc miraculo,  
flet uictus et uoluit gemens  
iram, dolorem, dedecus.

330 'Exemptus', inquit, 'carceri  
paulum benignis fotibus  
recreetur, ut pastum nouum  
poenis refectus praebeat.'

335 Coire toto ex oppido  
turbam fidelem cerneret,  
mollire praefultum torum,  
siccare cruda uulnera.

340 Ille unguarum duplices  
sulcos pererrat osculis,  
hic purpurantem corporis  
gaudet cruorem lambere.

Plerique uestem linteam  
stillante tingunt sanguine,  
tutamen ut sacrum suis  
domi reseruent posteris.

345 Tunc ipse manceps carceris  
et uinculorum ianitor,  
ut fert uetustas conscia,  
repente Christum credidit.

350 Hic obseratis uectibus  
densae specum caliginis  
splendore lucis aduenae  
micuisse clausum uiderat.

At uero postquam lectuli  
martyr quietem contigit,  
365 aeger morarum taedio  
et mortis incensus siti—,

si mors habenda eiusmodi est,  
quae corporali ergastulo  
mentem resoluit liberam  
360 et reddit auctori deo,

mentem piatam sanguine,  
mortis lauacris elutam,  
quae semet ac uitam suam  
Christo inmolandam praebuit—,

365 ergo ut recline mollibus  
reiecit aulaeis caput,  
uictor relictis artubus  
caelum capessit spiritus.

Cui recta celso tramite  
370 reseratur ad patrem uia,  
quam fratre caesus in pio  
Abel beatus scanderat.

Stipant euntem candidi  
375 hinc inde sanctorum chori  
parique missum carcere  
baptista Iohannes uocat.

At christiani nominis  
hostem coquebant inrita  
380 fellis uenena et liuidum  
cor efferata exusserant.

Saeuire inermem crederes  
fractis draconem dentibus:  
'Euasit exultans', ait,  
'rebellis et palmam tulit.

385 Sed restat illud ultimum:  
inferre poenam mortuo,  
feris cadauer tradere  
canibusue carpendum dare.

Iam nunc et ossa extinxero,  
390 ne sit sepulcrum funeris,  
quod plebs gregalis excolat  
titulumque figat martyris.'



Sic frendit et corpus sacrum  
profanus—a dirum nefas!—  
395 nudum negato tegmine  
exponit inter carices.

Sed nulla dirarum famis  
aut bestiarum aut alitum  
audet tropeum gloriae  
400 foedare tactu squalido.

Quin, si qua clangens inprobe  
circumuolarat eminus,  
trucis uolucris inpetu  
depulsa uertebat fugam.

405 Nam coruus, Heliae datus  
olim ciborum portitor,  
hoc munus inplet sedule  
et inremotus excubat.

Hic ex frutectis proximis  
410 infestus alarum sono  
oculosque pinnis uerberans  
exegit inmanem lupum.

Quis perfidorum credere  
ausit rapacem beluam,  
415 tauris paratam congregi,  
cessisse plumis mollibus?

Ibat malignum murmurans  
leui uolatu exterritus  
praedamque uisam fugerat  
420 custodis inbellis minis.

Quis audienti talia,  
Datiane, tunc sensus tibi,  
quantis gementem spiculis  
figebat occultus dolor,

425 cum te perempti corporis  
uirtute uictum cerneris  
ipsis et inpar ossibus  
uacuisque iam membris minor?

Sed quis, tyranne pertinax,  
430 hunc inpotentem spiritum  
determinabit exitus?  
nullusne te franget modus?

435 'Nullus, nec umquam desinam;  
nam si ferina inmanitas  
mansuescit et clementia  
coruos uoraces mitigat,

440 mergam cadauer fluctibus:  
insana numquam naufragis  
ignoscit unda et spumeum  
nescit profundum parcere.

Aut semper illic mobilis  
445 incerta per ludibria  
uagis feretur flatibus  
squamosa pascens agmina,

445 aut sub fragosis rupibus  
scabri petrarum murices  
inter recessus scrupeos  
discissa rumpent uiscera.

450 Ecquis uirorum strenue  
cumbam peritus pellere  
remo, rudente et carbaso,  
secare qui pontum queas,

455 rapias palustri e caespite  
corpus, quod intactum iacet,  
leuique uectum lembulo  
amplum per aequor auferas?

460 Sed complicatum sparteus  
claudat cadauer culleus,  
quem fune conexus lapis  
praeceps in altum deprimat.

At tu per undas emices  
rorante praepes palmula,  
donec relictum longior  
abscondat aspectus solum.'

465 Haec iussa quidam militum  
—Eumorfio nomen fuit—  
uiolentus, audax, barbarus,  
furore feruens adripit.

470 Funale textum conserit,  
suto quod inplet corpore,  
emensus et multum freti  
inter procellas excutit.

475 O praepotens uirtus dei,  
uirtus creatrix omnium,  
quae turgidum quondam mare  
gradiente Christo strauerat,

480 ut terga calcans aequoris  
siccis mearet passibus,  
plantas nec undis tingeret  
uasti uiator gurgitis!

Haec ipsa uirtus iusserat  
rubrum salum dehiscere,  
patente dum fundo aridum  
secura plebs iter terit.

485 Nec non et ipsa nunc iubet  
seruire sancto corpori  
pontum quietis lapsibus  
ad curua pronum litora.

490 Saxum molaris ponderis  
ut spuma candens innatat  
tantique custos pigneris  
fiscella fertur fluctibus.

495 Cernunt stupentes nauitae  
uectam remenso marmore  
labi retrorsum leniter  
aestu secundo et flamine.

500 Certant et ipsi concito  
pontum faselo scindere,  
longe sed artus praeuolant  
telluris ad mollem sinum.

Prius relatos denique  
humus quieta suscipit,  
quam pulsa summis nisibus  
carina portum tangeret.

505 Felix amoeni litoris  
secessus ille, qui sacra  
fouens harenis uiscera  
uicem sepulcri praebuit,

510 dum cura sanctorum pia  
deflens adornat aggerem  
tumuloque corpus creditum  
uitae reseruat posterae!

Sed mox subactis hostibus  
iam pace iustis reddita  
515 altar quietem debitam  
praestat beatis ossibus;

subiecta nam sacrario  
imamque ad aram condita  
caelestis auram muneris  
520 perfusa subter hauriunt.

Sic corpus, ast ipsum dei  
sedes receptum continet  
cum Maccabeis fratribus  
sectoque Eseiae proximum.

525 Simplex sed illis contigit  
corona poenarum, quibus  
finem malorum praestitit  
mortis supremus exitus.

Quid tale sector ausus est?  
530 truncata numquid corporis  
segmenta post serram feris  
obiecit aut undis dedit?

Num Maccabei martyris  
535 linguam tyrannus erutam  
raptamue pellem verticis  
aibus cruentis obtulit?

Tu solus, o bis inclyte,  
solus brauii duplicis  
540 palmam tulisti, tu duas  
simul parasti laureas.

In morte uictor aspera,  
tum deinde post mortem pari  
uictor triumpho proteris  
solo latronem corpore.

545 Adesto nunc et percipe  
uoces precantum supplices,  
nostri reatus efficax  
orator ad thronum patris!

550 Per te, per illum carcerem,  
honoris augmentum tui,  
per uincla, flammam, unguis,  
per carceralem stipitem,

per fragmen illud testeum,  
quo parta creuit gloria,  
555 et quem trementes posteri  
exosculamur lectulum,

miserere nostrarum precum,  
placatus ut Christus suis  
inclinat aurem prosperam  
560 noxas nec omnes inputet!

Si rite sollemnem diem  
ueneramur ore et pectore,  
si sub tuorum gaudio  
uestigiorum sternimur,

565 paulisper huc inlabere  
Christi fauorem deferens,  
sensus grauati ut sentiant  
leuamen indulgentiae.

Sic nulla iam restet mora,  
570 quin excitatam nobilis  
carnem resumat spiritus  
uirtute perfunctam pari,

ut, quae laborum particeps  
commune discrimen tulit,  
575 sit et coheres gloriae  
cunctis in aeuum saeculis.



# VI HYMNUS IN HONOREM BEATISSIMORUM MARTYRUM FRUCTUOSI, EPISCOPI ECCLESIAE TARRACONENSIS, ET AUGURII ET EULOGII DIACONORUM

Felix Tarraco, Fructuosi, uestris  
attollit caput ignibus coruscum  
leuuitis geminis procul relucens.

5 Hispanos deus aspicit benignus,  
arcem quandoquidem potens Hiberam  
trino martyre trinitas coronat.

Ardens Augurius capessit aetram  
nec non Eulogius simul supernum  
Christi lucidus ad sedile tendit.

10 Dux et praeuius et magister illis  
ad tantum decus ex episcopali  
clarus nomine Fructuosus ibat,

15 accitus qui praesidis repente  
iussu uenerat ad forum sacerdos  
leuuitis comitantibus duobus.

Inde ad carceream uiros catenam  
pastus sanguine carnifex trahebat,  
gaudet currere Fructuosus ultro.

20 Ac, ne quis socios timor feriret,  
praeceptor uehemens eundo firmat  
incenditque fidem calore Christi:

'Mecum state, uiri, uocat cruentus  
ad poenam coluber dei ministros;  
ne mors terreat! est parata palma.

25 Carcer christicolis gradus coronae est,  
carcer prouehit ad superna caeli,  
carcer conciliat deum beatis.'

His dictis adeunt specum reorum,  
exercent ibi mysticum lauacrum  
30 et purgamen aquae stupent tenebrae.

Sex hic continuis latent diebus,  
tandem stant trucis ad tribunal hostis,  
fratres tergeminos tremunt catastae.

Iudex Aemilianus iminebat,  
35 atrox, turbidus, insolens, profanus,  
aras daemonicas coli iubebat.

'Tu, qui doctor', ait, 'seris nouellum  
commenti genus, ut leues puellae  
lucos destituant, Iouem relinquunt,

40 damnes, si sapias, anile dogma;  
iussum est Caesaris ore Gallieni,  
quod princeps colit, ut colamus omnes.'

Haec fanti placidus refert sacerdos:  
'Aeternum colo principem dierum,  
45 factorem dominumque Gallieni,

et Christum patre prosatum perenni,  
cuius sum famulus gregisque pastor.'  
subridens ait ille: 'Iam fuisti.'

Nec differt furor aut refrenat iram,  
50 saeuis destinat ignibus cremandos,  
exultant prohibentque flere uulgum.

Quosdam de populo uidet sacerdos  
libandum sibi poculum offerentes.  
'Ieiunamus', ait, 'recuso potum:

55 nondum noua diem resignat hora,  
numquam conuiolabo ius dicatum  
nec mors ipsa meum sacrum resoluet.

Sic Christus sitiens crucis sub hora  
oblatus sibi poculum recusans  
60 nec libare uolens sitim peregit.'



Intrant interea locum rutunda  
conclusum cauea, madens ferarum  
multo sanguine quem furor frequentat,

65 cum spectacula perstrepunt cruenta  
ac uilis gladiator ense duro  
percussus cadit et fremit uoluptas.

Hic flammante pyra niger minister  
ardens supplicium parare iussus  
construxit facibus rogum supremis,

70 qui, dum corpora concremenda soluit,  
feruentes animas amore lucis  
fracto carceris expediret antro.

Certant officii pii sodales:  
plantis calciamenta dissolutis  
75 pronus detrahere studebat unus,

sed sanctus uetat ora Fructuosus  
inclinata premi: 'Facessite', inquit,  
'nec nostram grauet obsequella mortem;

80 atquin ipse meos pedes resoluam,  
ne uestigia praepedita uinclis  
tardis gressibus inruant in ignem.

Cur lamenta rigant genas madentes  
cur uestri memor ut fiam rogatis?  
cunctis pro populis rogabo Christum.'

85 Vix haec ediderat, relaxat ipse  
indumenta pedum, uelut Moyses  
quondam fecerat ad rubum propinquans.

90 Non calcare sacram cremationem  
aut adstare deo prius licebat,  
quam uestigia pura figerentur.

Stabat calce mera, resultat ecce  
caelo spiritus et serit loquellam,  
quae cunctos tremefecit audientes:

95 'Non est, credite, poena, quam uidetis,  
quae puncto tenui citata transit,  
nec uitam rapit illa, sed reformat.

Felices animae, quibus per ignem  
celsa scandere contigit Tonantis,  
quas olim fugiet perennis ignis!'

100 Haec inter rapidis focos crepantes  
intran passibus et minantur ipsis  
flammarum trepidantibus caminus.

Nexus denique, qui manus retrorsus  
in tergum reuocauerant reuinctas,  
105 intacta cute decidunt adusti.

Non ausa est cohibere poena palmas  
in morem crucis ad patrem leuandas,  
soluit brachia, quae deum precentur.

110 Priscorum specimen trium putares,  
quos olim Babylonicum per ignem  
cantantes stupuit tremens tyrannus.

Illis sed pia flamma tunc pepercit  
nondum tempore passionis apto  
nec mortis decus inchoante Christo.

115 Hos cum defugeret uaporus ardor,  
orant, ut celer ignis aduolaret  
et finem daret anxiiis periclis.

Exorata suos obire tandem  
maiestas famulos iubet caducis  
120 missos corporibus sibique reddi.

Vidit praesidis ex domo satelles  
caelum martyribus patere apertum  
insignesque uiros per astra ferri.

125 Quin et filiolae monens erili  
ostendit sceleris notam paterni,  
caelo uiuere, quos forum peremit.

Haec tum uirginitas palam uidere  
per sudum meruit parente caeco,  
ut crimen domini domus timeret.

130 Tum de corporibus sacris fauillae  
et perfusa mero leguntur ossa,  
quae raptim sibi quisque uindicabat.

Fratrum tantus amor domum referre  
sanctorum cinerum dicata dona  
135 aut gestare sinu fidele pignus.

Sed ne reliquias resuscitandas  
et mox cum domino simul futuras  
discretis loca diuidant sepulcris,

140           cernuntur niueis stolis amicti:  
mandant restitui cauoque claudi  
mixtim marmore puluerem sacrandum.

          O triplex honor, o triforme culmen,  
quo nostrae caput excitatur urbis,  
cunctis urbibus eminens Hiberis!

145           Exultare tribus libet patronis,  
quorum praesidio fouemur omnes  
terrarum populi Pyrenearum.

          Circumstet chorus et utroque sexu:  
heros, uirgo, puer, senex, anulla,  
150           uestrum psallite rite Fructuosum!

          Laudans Augurium resultet hymnus  
mixtis Eulogium modis coequans,  
reddamus paribus pares camenas.

155           Hinc aurata sonent in arce tecta,  
blandum litoris extet inde murmur  
et carmen freta feriata pangant.

          Olim tempus erit ruente mundo,  
cum te, Tarraco, Fructuosus acri  
soluet supplicio tegens ab igni.

160           Fors dignabitur et meis medellam  
tormentis dare prosperante Christo  
dulces hendecasyllabos reuoluens.



# VII

## HYMNUS IN HONOREM QUIRINI MARTYRIS, EPISCOPI ECCLESIAE SISCIANAE

Insignem meriti uirum,  
Quirinum placitum deo,  
urbis moenia Sisciae  
concessum sibi martyrem  
5 complexu patrio fouent.

Hic sub Galerio duce,  
qui tunc Illyricos sinus  
urgebat dicionibus,  
fertur catholicam fidem  
10 inlustrasse per exitum.

Non illum gladii rigor,  
non incendia, non ferae  
crudeli interitu necant,  
sed lymfis fluuialibus  
15 gurges, dum rapit, abluit.

Nil refert, uitreo aequore  
an de flumine sanguinis  
tinguat passio martyrem,  
aeque gloria prouenit  
20 fluctu quolibet uuida.

Summo pontis ab ardui  
sanctae plebis episcopus  
in praeceps fluuio datur  
suspensum laqueo gerens  
25 ingentis lapidem molae.

Deiectum placidissimo  
amnis uertice suscipit  
nec mergi patitur sibi  
miris uasta natatibus  
30 saxi pondera sustinens.

Spectant eminus e solo  
doctorem pauidi greges;  
nam Christi populus frequens  
riparum sinuamina  
35 stipato agmine saepserat.

Sed Quirinus, ut eminens  
os circumtulit, heu, suos  
exemplo trepidos uidet;  
nil ipse proprii memor  
40 inter stagna periculi

confirmat pia pectora  
uerbis mitificis rogans,  
ne quem talia terreant  
neu constans titubet fides  
45 aut poenam putet emori.

Dicentem fluitantibus  
amnis terga uehunt uadis  
nec substrata profunditas  
saxoque et laqueo et uiro  
50 audet sponte dehiscere.

Sensit martyr episcopus  
iam partam sibi praeripi  
palmam mortis et exitus  
ascensumque negarier  
55 aeterni ad solium patris.

'Hisu cunctipotens', ait,  
'haudquaquam tibi gloria  
haec est insolita aut noua  
calcare fremitum maris  
60 prona et flumina sistere.

Scimus discipulum Petrum,  
cum uestigia tingeret  
mortali trepidus pede,  
dextrae subsidio tuae  
65 subiecisse salum solo;

Iordanem quoque nouimus  
tortis uerticibus uagum,  
dum fertur rapido impetu,  
ad fontem refluis retro  
70 confugisse meatibus.

Haec miracula sunt tuae  
uirtutis, domine, ut, modo  
suspendar leue praenatans,  
summo gurgite fluminis  
75 cum collo scopulum traham.

Iam plenus titulus tui est  
et uis prodita nominis,  
quam gentilis hebet stupor:  
absoluas, precor, optime,  
80 huius nunc animae moras.

Quid possis, probat amnicus,  
qui uectat silicem, liquor.  
hoc iam, quod superest, cedo,  
quo nil est pretiosius,  
85 pro te, Christe deus, mori!

Orantem simul halitus  
et uox deserit et calor,  
scandit spiritus ardua,  
fit pondus graue saxeum,  
90 corpus suscipiunt aquae.





# VIII

## DE LOCO, IN QUO MARTYRES PASSI SUNT, NUNC BAPTISTERIUM EST CALAGURRI

Electus Christo locus est, ubi corda probata  
prouehat ad caelum sanguine, purget aqua.  
Hic duo purpureum domini pro nomine caesi  
martyrium pulchra morte tulere uiri.  
5 Hic etiam liquido fluit indulgentia fonte  
ac ueteres maculas diluit amne nouo.  
Qui cupit aeternum caeli conscendere regnum,  
huc ueniat sitiens, ecce parata uia est.  
10 Ante coronati scandebant ardua testes  
atria, nunc lotae celsa petunt animae.  
Spiritus aeterno solitus descendere lapsu,  
ut dederat palmam, sic tribuit ueniam.  
Haurit terra sacros aut fonte aut sanguine rores  
exundatque suo iugiter uda deo.  
15 Ipse loci est dominus, laterum cui uulnere utroque  
hinc cruor effusus fluxit et inde latex.  
Ibitis hinc, ut quisque potest, per uulnera Christi  
euectus gladiis alter et alter aquis.



# IX

## PASSIO SANCTI CASSIANI FOROCORNELIENSIS

Sylla Forum statuit Cornelius; hoc Itali urbem  
uocant ab ipso conditoris nomine.  
Hic mihi, cum peterem te, rerum maxima Roma,  
spes est oborta prosperum Christum fore.  
5 Stratus humi tumulo aduoluebar, quem sacer ornat  
martyr dicato Cassianus corpore.  
Dum lacrimans mecum reputo mea uulnera et omnes  
uitae labores ac dolorum acumina,  
erexi ad caelum faciem, stetit obuia contra  
10 fucis colorum picta imago martyris  
plagas mille gerens, totos lacerata per artus,  
ruptam minutis praeferens punctis cutem.  
Innumeri circum pueri—miserabile uisu—  
confossa paruis membra figebant stilis,  
15 unde pugillares soliti percurrere ceras  
scholare murmur adnotantes scripserant.  
Aedituus consultus ait: ‘Quod prospicis, hospes,  
non est inanis aut anilis fabula;  
historiam pictura refert, quae tradita libris  
20 ueram uetusti temporis monstrat fidem.  
Praefuerat studiis puerilibus et grege multo  
saeptus magister litterarum sederat,  
uerba notis breuibus comprehendere cuncta peritus  
raptimque punctis dicta praepetibus sequi.  
25 Aspera nonnumquam praecepta et tristia uisa  
inpube uulgus mouerant ira et metu;  
doctor amarus enim discenti semper efybo  
nec dulcis ulli disciplina infantiae est.  
Ecce fidem quatiens tempestas saeua premebat  
30 plebem dicatam christianae gloriae.  
Extrahitur coetu e medio moderator alumni  
gregis, quod aris supplicare spreuerat.  
Poenarum artifici quaerenti, quod genus artis  
uir nosset alto tam rebellis spiritu,  
35 respondent: ‘Agmen tenerum ac puerile gubernat  
fictis notare uerba signis inbuens.’  
‘Ducite’, conclamat, ‘captiuum ducite, et ultro  
donetur ipsis uerberator paruuilis.

Vt libet, inludant, lacerent inpune manusque  
 40           tinguant magistri feriatas sanguine;  
 ludum discipulis uolupe est ut praebeat ipse  
           doctor seuerus, quos nimis coercuit.<sup>1</sup>  
 Vincitur post terga manus spoliatus amictu,  
           adest acutis agmen armatum stilis.  
 45       Quantum quisque odii tacita conceperat ira,  
           effundit ardens felle tandem libero.  
 Coniciunt alii fragiles inque ora tabellas  
           frangunt, relisa fronte lignum dissilit,  
 50       buxa crepant cerata genis inpacta cruentis  
           rubetque ab ictu curta et umens pagina.  
 Inde alii stimulos et acumina ferrea uibrant,  
           qua parte aratis cera sulcis scribitur,  
 et qua secti apices abolentur et aequoris hyrti  
           rursus nitescens innouatur area.  
 55       Hinc foditur Christi confessor et inde secatur,  
           pars uiscus intrat molle, pars scindit cutem.  
 Omnia membra manus pariter fixere ducentae  
           totidemque guttae uulnerum stillant simul.  
 Maior tortor erat, qui summa pupugerat infans,  
 60       quam qui profunda perforarat uiscera,  
 ille leuis, quoniam percussor morte negata  
           saeuire solis scit dolorum spiculis,  
 hic, quanto interius uitalia condita pulsat,  
           plus dat medellae, dum necem prope applicat.  
 65       ‘Este, precor, fortes et uincite uiribus annos,  
           quod defit aeuo, suppleat crudelitas!’  
 Sed male conatus tener infirmusque laborat,  
           tormenta crescunt, dum fatiscit carnifex.  
 ‘Quid gemis?’ exclamat quidam, ‘tute ipse magister  
 70       istud dedisti ferrum et armasti manus.  
 Reddimus ecce tibi tam milia multa notarum,  
           quam stando, flendo te docente excepimus.  
 Non potes irasci, quod scribimus; ipse iubebas,  
           numquam quietum dextera ut ferret stilum.  
 75       Non petimus totiens te praeceptore negatas,  
           auare doctor, iam scholarum ferias.  
 Pangere puncta libet sulcisque intexere sulcos,  
           flexas catenis inpedire uirgulas.  
 Emendes licet inspectos longo ordine uersus,  
 80       mendosa forte si quid errauit manus,  
 exerce imperium, ius est tibi plectere culpam,  
           si quis tuorum te notauit segnius.<sup>1</sup>  
 Talia ludebant pueri per membra magistri  
           nec longa fessum poena soluebat uirum.  
 85       Tandem luctantis miseratus ab aethere Christus  
           iubet resolui pectoris ligamina

difficilesque moras animae ac retinacula uitae  
relaxat artas et latebras expedit.  
Sanguis ab interno uenarum fonte patentes  
90 uias secutus deserit praecordia  
totque foraminibus penetrati corporis exit  
fibrarum anhelans ille uitalis calor.  
'Haec sunt, quae liquidis expressa coloribus, hospes,  
miraris, ista est Cassiani gloria.  
95 Suggere, si quod habes iustum uel amabile uotum,  
spes si qua tibi est, si quid intus aestuas!  
Audit, crede, preces martyr prosperrimus omnes  
ratasque reddit, quas uidet probabiles.'  
Pareo: conplector tumulum, lacrimas quoque fundo,  
100 altar tepescit ore, saxum pectore.  
Tunc arcana mei percenseo cuncta laboris,  
tunc, quod petebam, quod timebam murmuro:  
et post terga domum dubia sub sorte relictam  
et spem futuri forte nutantem boni.  
105 Audior, urbem adeo, dextris successibus utor,  
domum reuertor, Cassianum praedico.



# X

## SANCTI ROMANI CONTRA GENTILES DICTA

Romane, Christi fortis adsertor dei,  
elinguis oris organum fautor moue,  
largire comptum carmen infantissimo,  
fac ut tuarum mira laudum concinam!  
5 nam scis et ipse posse mutos eloqui.

Plectrum palati et faucium saeuus tibi  
tortor reuulsit nec tamen silentium  
indixit ori, quo fatebaris deum.  
uox ueritatis testis extinguere nequit,  
10 nec si recisis palpitet meatibus.

Sic noster haerens sermo lingua debili  
balbutit et modis laborat absonis,  
sed si superno rore respergas iecur  
et spiritali lacte pectus inriges,  
15 uox inpeditos rauca laxabit sonos.

Euangelista scripsit ipsum talia  
praecepta Messian dedisse apostolis:  
'Nolite uerba, cum sacramentum meum  
erit canendum, prouidenter quaerere,  
20 ego inparatis quae loquantur suggeram.'

Sum mutus ipse, sed potens facundiae  
mea lingua Christus luculente disseret.  
ipse explicabit, quos supremo spiritu  
daemon tumultus, dum domatur, mouerit,  
25 furore pestis peior in nouissimo.

Sic uulneratus anguis ictu spiculi  
ferrum remordet et dolore saeuior  
quassando pressis inmoratur dentibus,  
hastile fixum sed manet profundius  
30 nec cassa sentit morsuum pericula.

Galerius orbis forte Romani statum  
ductor regebat, ut refert antiquitas,  
inmitis, atrox, asper, implacabilis.  
edicta late mundum in omnem miserat:  
35 Christum negaret, quisque mallet uiuere.

Haec ille serpens ore dictat regio,  
qui mortuorum de sepulcris exiens  
clamat: 'Quid ante tempus aduentu cito  
mea regna soluis? parce, fili altissimi,  
40 uel possidere corda porcorum iube!'

Praefectus istis inminens negotiis  
Asclepiades ire mandat milites  
ecclesiasten usque de sacrariis  
raptare plebem mancipandam uinculis,  
45 ni disciplinam Nazarenam respuat.

Mox ipse templum cogitans inrumpere  
et dissipare sancta sanctorum studens  
armis profanus praeparabat inpiis  
altaris aram funditus pessum dare  
50 foresque et ipsas in ruinam soluere.

Praecurrit index his repente cognitis  
Romanus acris heros excellentiae,  
uenire in armis perduelles nuntiat  
animos pauentum praestruens hortatibus,  
55 stent ut parati neue cedant turbini.

Conspirat uno foederatus spiritu  
grex christianus, agmen inperterritum  
matrum, uirorum, paruulorum, uirginum;  
fixa et statuta est omnibus sententia  
60 fidem tueri uel libenter emori.

Refert repulsus miles ad subsellia  
plebis rebellis esse Romanum ducem,  
flagrare cunctos peruicaci audacia,  
iugulos resectos obstinate opponere,  
65 quo gloriosa morte fortes oppetant.

Praeceptis iubetur inde Romanus rapi  
solusque ut incitator et fax omnium  
pro contumaci plebe causam dicere.  
it non resistens seque uinciri petit  
70 flexas et ultro torquet in tergum manus.



Amor coronae paene praeuenit trucem  
lictoris artem sponte nudas offerens  
costas bisulcis exsecandas unguis.  
inrumpit altum limen et praeconibus  
75 stupore mutis ipse tortorem trahit.

Adstanti ob ora sic tyrannus incipit:  
'Infame monstrum, uilis, intestabilis  
tu uentilator urbis et uulgi leuis  
procella mentes inquietas mobiles,  
80 ne se inperita turba dedat legibus.

Populare quiddam sub colore gloriae  
inlitterata credidit frequentia,  
ut se per aeuum consecrandos autument,  
si bella diuis ceu gigantes inferant  
85 uictique flammis obruantur montium.

Hoc tu parasti, perditae, spectaculum  
cladis cruentae denecandis ciuibus,  
quos ut profanos inpiati et saeculi  
reos necesse est te magistro interfici,  
90 tu causa mortis, tu malorum signifer.

Ni fallor, aequum est, ut, quod auctor improbus  
tolerare multos compulisti ut carnifex,  
in te recurrat proque tantis caedibus,  
quae mox futurae, primus exitium luas  
95 feras et ipse, quod ferendum suaseras.'

His ille contra reddit ore libero:  
'Amplector, o praefecte, nec me subtraho,  
ut pro fideli plebe solus inmoler  
dignus subire cuncta, si me consulis,  
100 quaecumque uestra iusserit crudelitas.

Intrare seruis idolorum ac daemonum  
sanctam salutis non licet nostrae domum,  
ne polluat purus orandi locus;  
confido sancto in spiritu numquam tibi  
105 dandum, ut beatum limen attingas pede,

nisi forte noster factus in nostrum gregem  
mereare sumi, quod pater faxit deus.'  
incensus his Asclepiades iusserat  
euiscerandum corpus eculeo eminus  
110 pendere et uncis uinculisque crescere.

Apparitores sed furenti suggerunt  
illum uetusta nobilem prosapia  
meritisque multis esse primum ciuium.  
iubet amoueri noxiam stipitem,  
115 plebeia clarum poena ne damnet uirum.

‘Tundatur’, inquit, ‘terga crebris ictibus  
plumboque ceruix uerberata extuberet.  
persona quaeque competenter plectitur  
magnique refert, uilis an sit nobilis;  
120 gradu reorum forma tormentis datur.’

Pulsatus ergo martyr illa grandine  
postquam inter ictus dixit hymnum plumbeos,  
erectus inquit: ‘Absit, ut me nobilem  
sanguis parentum praestet aut lex curiae;  
125 generosa Christi secta nobilitat uiros.

Si, prima nostris quae sit incunabulis  
origo, textu stemmatis recenseas,  
dei parentis esse ab ore coepimus.  
cui quisque seruit, ille uere est nobilis,  
130 patri rebellis inuenitur degener.

Honos deinde stemmati accedit nouus  
et splendor ingens ut magistratus uenit,  
si confitendi nominis testem probum  
signent inusta ferri et ignis uulnera  
135 et uim dolorum mors sequatur inclyta.

Caue, benignus esse peruerse uelis,  
nec mi remissus leniter pepercetis;  
incumbe membris, tortor, ut sim nobilis!  
his ampliatus si fruar successibus,  
140 genus patris matrisque flocci fecero.

Haec ipsa uestra dignitatum culmina  
quid esse censes? nonne cursim transeunt  
fasces, secures, sella, praetextae togae,  
lictor, tribunal et trecenta insignia,  
145 quibus tumetis moxque detumescitis?

Cum consulatum initis, ut uernae solent—  
pudet fateri—farre pullos pascitis;  
aquila ex eburna sumit adrogantiam  
gestator eius ac superbit beluae  
150 inflatus osse, cui figura est alitis.

Iam si sub aris ad sigillorum pedes  
iaceatis infra sectilem quercum siti,  
quid esse uobis aestimem proiectius?  
nudare plantas ante carpentum scio  
155 proceres togatos matris Ideae sacris.

Lapis nigellus euehendus essedo  
muliebris oris clausus argento sedet,  
quem dum ad lauacrum praeuendo ducitis  
pedes remotis atterentes calceis,  
160 Almonis usque peruenitis riuulum.

Quid illa turpis pompa? nempe ignobiles  
uos esse monstrat, cum luperci curritis.  
quem seruulorum non rear uilissimum,  
nudus plateas si per omnes cursitans  
165 pulset puellas uerbere ictas ludicro?

Miseret tuorum me sacrorum et principum  
morumque, Roma, saeculi summum caput.  
age, explicemus, si placet, mysteria,  
praefecte, uestra: iam necesse est audias,  
170 nolis uelisne, quid colatis sordium.

Nec terret ista, qua tumes, uaesania,  
quod uultuosus, quod supinus, quod rigens  
tormenta leti comminaris asperi;  
si me mouere rebus ullis niteris,  
175 ratione mecum, non furore, dimica!

Iubes, relictis patris et Christi sacris  
ut tecum adorem feminas mille ac mares,  
deas deosque deque sexu duplici  
natos, nepotes, abnepotes, editos  
180 et tot stuprorum sordidam prosapiam.

Nubunt puellae, saepe luduntur dolis,  
amasionum conprimuntur fraudibus,  
incesta feruent, furta moechorum calent,  
fallit maritus, odit uxor paelicem,  
185 deos catenae conligant adulteros.

Ostende, quaeso, quas ad aras praecipis  
ueruece caeso fumet ut caespes meus?  
Delfosne pergam? sed uetat palestrici  
corrupta ephybi fama, quem uester deus  
190 effeminauit gymnadis licentia.

Mox fleuit inpuratus occisum graui  
disco et dicauit florulentum subcubam;  
conductus idem pauit alienum pecus,  
furem deinde perdit passus gregis  
195 segnis bubulcus tela et ipsa pedidit.

An ad Cybebes ibo lucum pineum?  
puer sed obstat gallus ob libidinem  
per triste uulnus perque sectum dedecus  
ab inpudicae tutus amplexu deae,  
200 per multa Matri sacra plorandus spado.

Sed, credo, magni limen amplectar Iouis,  
qui si citetur legibus uestris reus,  
laqueis minacis implicatus Iuliae  
luat seueram uictus et Scantiniam  
205 te cognitore dignus ire in carcerem.

Quid, aureorum conditorem temporum  
censes colendum? quem fugacem non negas  
latuisse furtim, dum reformidat malum,  
quem si beate uiuere audit Iuppiter,  
210 plectat necesse est occulendi conscios.

Quid inter aras dissidentum numinum  
putas agendum? Martis indignabitur  
offensa uirtus, si colatur Lemnius,  
Iunonis iram sentiet, quisque ut deum  
215 signo aut sacello consecrarit Herculem.

Dicis licenter haec poetas fingere,  
sed sunt et ipsi talibus mysteriis  
tecum dicati, quodque describunt colunt.  
tu cur piaclum tam libenter lectitas,  
220 cur in theatris te uidente id plauditur?

Cygnus stuprator peccat inter pulpita,  
saltat Tonantem tauricornem ludius,  
spectator horum pontifex summus sedes  
ridesque et ipse nec negando diluis,  
225 cum fama tanti polluatur numinis.

Cur tu, sacrate, per cachinnos solueris,  
cum se maritum fingit Alcmenae deus?  
meretrix Adonem uulneratum scaenica  
libidinoso plangit adfectu palam,  
230 nec te lupanar Cypridis sanctae mouet?

235 Quid, quod sub ipsis ueritas signis patet,  
formata in aere criminum uestigiis?  
quid uult sigillum semper adfixum Ioui  
auis ministrae? nempe uelox armiger  
leno, exoletum qui tyranno pertulit.

240 Facem recincta ueste praetendit Ceres:  
cur, si deorum nemo rapuit uirginem,  
quam nocte quaerens mater errat peruigil?  
fusus rotantem cernimus Tirintium:  
cur, si Neaerae non fuit ludibrio?

245 Quid, rusticorum monstra detester deum,  
Faunos, Priapos, fistularum praesides,  
nymfas natantes incolasque aquatiles,  
sitas sub alto more ranarum lacu,  
diuinitatis ius in algis uilibus?

250 Ad haec colenda me uocas, censor bone?  
potesne quidquam tale, si sanum sapis,  
sanctum putare? nonne pulmonem mouet  
derisus istas intuens ineptias,  
quas uinolentae somniis fingunt anus?

255 Aut si, quod usquam est uanitatis mysticae,  
nobis colendum est, ipse primus incipe.  
promisce adora, quidquid in terris sacri est,  
deos Latinos et deos Aegyptios,  
quis Roma libat, quis Canopus supplicat.

260 Venerem precaris, conprecare et simiam;  
placet sacratus aspis Aesculapii:  
crocodillus, ibis et canis cur displicent?  
adpone porris religiosas arulas,  
uenerare acerbum caepe, mordax allium.

265 Fuligini ture placantur lares  
et respuuntur consecrata holuscula?  
aut unde maior esse maiestas focis  
quam nata in hortis sarculatis creditur,  
si numen ollis, numen et porris inest?

270 Sed pulchra res est forma in aere sculptilis:  
quid inprecabor officinis Graeciae,  
quae condiderunt gentibus stultis deos?  
forceps Mironis, malleus Polycliti  
natura uestrum est atque origo caelitum.

Ars seminandis efficax erroribus  
barbam rigentem dum Iouis circumplicat,  
dum defluentem leniter flectens comam  
limat capillos et corimbos Liberi  
275 et, dum Mineruae pectus hydris asperat,

iniecit atram territis formidinem,  
ut fulmen aeris ceu Tonantis horreant,  
tremant uenenum sibilantis Gorgonae,  
putent ephybum post triumphos Indicos  
280 ferire thyrsos posse, cum sit ebrius.

Tum quod Dianam molle succinctam uident,  
uenantis arcum pertimescunt uirginis;  
si forte uultum tristioris Herculis  
liquore crispo massa finxit fusilis,  
285 clauam minari, ni colatur, creditur.

Iam quis pauentum corda terror occupat,  
Iunonis iram si polite expresserit?  
uelut retortis intuens obtutibus  
auertat ora de litantis hostia,  
290 lapis seuera fronte mentitur minas.

Miror, quod ipsum non sacrastris Mentorem  
nec templum et aras ipse Fidas habet,  
fabri deorum uel parentes numinum,  
qui si caminis institissent segnius,  
295 non esset ullus Iuppiter conflatilis.

Non erubescis, stulte, pago dedite,  
te tanta semper perdidisse obsonia,  
quae dis ineptus obtulisti talibus,  
quos trulla, peluis, cantharus, sartagines,  
300 fracta et liquata contulerunt uascula?

Ignosco fatuis haec tamen uulgaribus,  
quos lana terret discolora in stipite,  
quos saepe falsus circulator decipit,  
quibus omne sanctum est, quod pauendum rancidae  
305 edentularum cantilenae suaserint;

uos eruditos miror et doctos uiros,  
perpensa uitae quos gubernat regula,  
nescire uel diuina uel mortalia  
quo iure constent, quanta maiestas regat,  
310 quidquid creatum est, quae creauit omnia.

Deus perennis, res inaestimabilis,  
non cogitando, non uidendo clauditur,  
excedit omnem mentis humanae modum  
nec comprehendi uisibus nostris ualet  
315 extraque et intus inplet ac superfluit.

Intemporalis, antequam primus dies,  
esse et fuisse semper unus obtinet;  
lux ipse uera ueri et auctor luminis,  
cum lumen esset, lumen effudit suum,  
320 ex luce fulgor natus hic est filius.

Vis una patris, uis et una est filii  
unusque ab uno lumine splendor satus  
pleno refulsit claritatis numine;  
natura simplex pollet unius dei  
325 et, quidquid usquam est, una uirtus condidit:

caelum solumque, uim marini gurgitis,  
globos dierum noctiumque praesides,  
uentos, procellas, fulgura, imbres, nubila,  
septem triones, hesperos, aestus, niues,  
330 fontes, pruinas et metalla et flumina;

praerupta, plana, montium conuallia,  
feras, uolucres, reptiles, natatiles,  
iumenta, pecua, subiugales, beluas,  
flores, fructecta, germina, herbas, arbores,  
335 quae sunt odori quaeque uernant esui.

Haec non labore et arte molitus deus  
sed iussione, quam potestas protulit,  
mandauit esse; facta sunt, quae non erant,  
uerbo creauit omniformem machinam,  
340 uirtus paterna semper in uerbo fuit.

Cognostis ipsum, nunc colendi agnoscite  
ritum modumque, quale sit templi genus,  
quae dedicari sanxerit donaria,  
quae uota poscat, quos sacerdotes uelit,  
345 quod mandet illic nectar inmolarier.

Aedem sibi ipse mente in hominis condidit  
uiuam, serenam, sensualem, flabilem,  
solui incapacem posse nec destructilem,  
pulchram, uenustam, pra eminentem culmine,  
350 discriminatis inlitam coloribus.

Illic sacerdos stat sacro in limine  
foesque primas uirgo custodit Fides,  
innexa crines uinculis regalibus  
poscit litari uictimas Christo et patri,  
365 quas scit placere candidatas, simplices:

frontis pudorem, cordis innocentiam,  
pacis quietem, castitatem corporis,  
dei timorem, regulam scientiae,  
ieiuniorum parcitatem sobriam,  
360 spem non iacentem, semper et largam manum.

Ex his amoenus hostiis surgit uapor  
uincens odorem balsami, turis, croci,  
auras madentes Persicorum aromatum,  
sublatus inde caelum adusque tollitur  
365 et prosperatum dulce delectat deum.

Hanc disciplinam quisquis infensus uetat,  
uetat probatum uiuere et sanctum sequi,  
uetat uigorem mentis alte intendere  
nostrique acumen ignis ad terram uocat  
370 nec excitari uim sinit prudentiae.

O mersa limo caecitas gentilium,  
o carnulenta nationum pectora,  
o spissus error, o tenebrosum genus  
terris amicum, deditum cadaueri,  
375 subiecta semper intuens, numquam supra!

Furorne summus ultima et dementia est  
deos putare, qui creantur nuptiis,  
rem spiritalem terrulente quaerere,  
elementa mundi consecrare altaribus,  
380 id, quod creatum est, conditorem credere,

deasceato supplicare stipiti,  
uerris cruore scripta saxa spargere,  
aras ofellis obsecrare bubulis,  
homines fuisse cum scias, quos consecras,  
385 urnas reorum morticinas lambere?

Desiste, iudex saeculi, tantum nefas  
uiris iubere fortibusque et liberis!  
nil est amore ueritatis celsius;  
dei perennis nomen adserentibus  
390 nihil pauori est, mors et ipsa subiacet.'



Dudum coquebat disserente martyre  
Asclepiades intus iram subdolam  
stomachatus alto felle, dum longum silet  
bilemque tectis concipit praecordiis,  
395 tandem latentis uim furoris euomit:

‘Pro Iuppiter! quid est, quod ex hoc audio?  
stat inter aras et deorum imagines  
et, quod fateri cogor, in medio foro  
tacente memet ac perorat perditus,  
400 quidquid sacrorum est ore foedans inpio.

O fas priorum, moris o prisci status!  
inuenta regum pro salute publica  
Pompiliorum nostra carpunt saecula.  
quis hos sofistas error inuexit nouus,  
405 qui non colendos esse diuos disputent?

Nunc dogma nobis christianum nascitur  
post euolutos mille demum consules  
ab urbe Roma, ne retexam Nestoras.  
quidquid nouellum surgit, olim non fuit.  
410 uis summa rerum nosse? Pyrram consule!

Vbi iste uester tunc erat summus deus,  
dium fauore cum puer Mauortius  
fundaret arcem septicollem Romulus?  
quod Roma pollet auspicato condita,  
415 Ioui Statori debet et dis ceteris.

Hoc sanctum ab aeuo est, hoc ab atauis traditum:  
placanda nobis pro triumphis principis  
delubra, faustus ut secundet gloriam  
procinctus utque subiugatis hostibus  
420 ductor quietum frenet orbem legibus.

Accingere ergo, quisquis es, nequissime,  
pro principali rite nobiscum deos  
orare uita uel, quod hostem publicum  
pati necesse est, solue poenam sanguine:  
425 spreuisse templa respuisse est principem.’

Tunc ille: ‘Numquam pro salute et maximis  
fortissimisque principis cohortibus  
aliter precabor, quam fidele ut militent  
Christique lymfis ut renascantur patri,  
430 capiant et ipsum caelitus paraclitum,

ut idolorum respuant caliginem,  
 cernant ut illud lumen aeternae spei  
 non succulentis influens obtutibus  
 nec corporales per fenestras emicans,  
 435 puris sed intus quod relucet mentibus.

Pupilla carnis crassa crassum perspicit  
 et res caduca, quod resoluendum est, uidet,  
 liquidis uidendis aptus est animae liquor,  
 natura feruens sola feruentissimae  
 440 diuinitatis uim coruscantem capit.

Hoc, opto, lumen imperator nouerit  
 tuus meusque, si uelit fieri meus;  
 nam si resistit christiano nomini,  
 meus ille talis imperator non erit,  
 445 scelus iubenti, crede, numquam seruiam.'

'Statis, ministri?' clamitans iudex ait,  
 'statis manusque continetis uindices?  
 non rupta sulcis dissecatis uiscera,  
 animam nec intus abditam rimamini,  
 450 erumpit unde uox profana in principem?'

Scindunt utrumque milites teterrimi  
 mucrone hiulco pensilis latus uiri,  
 sulcant per artus longa tractim uulnera,  
 obliqua rectis, recta transuersis secant  
 455 et iam relectis pectus albet ossibus.

Nitendo anhelant, diffluunt sudoribus,  
 cum sit quietus heros, in quem saeuiunt.  
 haec inter addit sponte Romanus loqui:  
 'Si quaeris, o praefecte, uerum noscere,  
 460 hoc omne, quidquid lancinamur, non dolet.

Dolet, quod error pectori insedit tuo,  
 populos quod istos perditos tecum trahis.  
 currunt frequentes undique ad spectaculum,  
 gentile uulgus, heu, gemenda corpora,  
 465 crudumque nostrae sortis exemplum tremunt.

Audite cuncti, clamo longe ac praedico,  
 emitto uocem de catasta celsior:  
 Christus paternae gloriae splendor, deus,  
 rerum creator, noster idem particeps  
 470 spondet salutem perpetem credentibus,

animae salutem, sola quae non occidit,  
sed iuge durans dispares casus subit:  
aut luce fulget aut tenebris mergitur,  
Christum secuta patris intrat gloriam,  
475 disiuncta Christo mancipatur tartaro.

Curanda mercis qualitas, quaenam mihi  
contingat olim perpetis substantiae;  
nam membra parui pendo, quo pacto cadant,  
casura certe lege naturae suae.  
480 instat ruina; quod resoluendum est, ruat.

Nec distat, ignis et fidiculae saeuiant,  
an corpus aegrum languor asper torqueat,  
cum saepe morbos maior armet saeuitia.  
non unguarum tanta uis latus fodit,  
485 mucrone quanto dira pulsat pleurisis,

nec sic inusta lamminis ardet cutis,  
ut febris atro felle uenas exedit  
uel summa pellis ignis obductus coquit  
papulasque feruor aestuosus excitat:  
490 credas cremari stridulis cauteribus.

Miserum putatis, quod retortis pendeo  
extentus ulnis, quod reuelluntur pedes,  
compago neruis quod sonat crepantibus:  
sic heulantes ossa clamant diuidi,  
495 nodosa torquet quos podagra et artrisis.

Horretis omnes hasce carnificum manus:  
num mitiores sunt manus medentium,  
laniena quando saeuit Hippocratica?  
uiuuum secatur uiscus et recens cruor  
500 scalpella tinguunt, dum putredo abraditur.

Putate ferrum triste chirurgos meis  
inferre costis, quod secat salubriter;  
non est amarum, quo reformatur salus:  
uidentur isti carpere artus tabidos,  
505 sed dant medellam rebus intus uiuidis.

Quis nescit autem, quanta corruptela sit  
contaminatae carnis ac solubilis?  
sordet, tumescit, liquitur, faetet, dolet,  
inflatur ira, soluitur libidine,  
510 plerumque felle tincta liuores trahit.

Aurum regestum nonne carni acquiritur?  
inlusa uestis, gemma, bombyx, purpura  
in carnis usum mille quaeruntur dolis,  
luxus uorandi carnis aruinam fouet,  
515 carnis uoluptas omne per nefas ruit.

Medere, quaeso, carnifex, tantis malis,  
concide, carpe fomitem peccaminum,  
fac, ut resecto debilis carnis situ  
dolore ab omni mens supersit libera  
520 nec gestet ultra, quod tyrannus amputet.

Nec terrearis turba circumstantium:  
hoc perdo solum, quod peribit omnibus,  
regi, clienti pauperique et diuiti.  
sic uernularum, sic senatorum caro  
525 tabescit, imo cum sepulcro condita est.

Iactura uilis mordet et damnum leue,  
si, quo carendum est, perdere extimescimus.  
cur, quod necesse est, non uoluntas occupat,  
natura cur non uertit in rem gloriae?  
530 legale damnum deputemus praemiis.

Sed praemiorum forma quae sit fortibus,  
uideamus, illa nempe, quae numquam perit.  
caelo refusus subuolabit spiritus,  
dei parentis perfruetur lumine  
535 regnante Christo stans in arce regia.

Quandoque caelum ceu liber plicabitur,  
cadet rotati solis in terram globus,  
sferam ruina menstruaem distruet,  
deus superstes solus et iusti simul  
540 cum sempiternis permanebunt angelis.

Contemne praesens utile, o prudens homo,  
quod terminandum, quod relinquendum est tibi,  
omite corpus, rem sepulcri et funeris,  
tende ad futuram gloriam, perge ad deum,  
545 agnosce, qui sis, uince mundum et saeculum!

Vixdum elocutus martyr hanc peregerat  
orationem, cum furens interserit  
Asclepiades: 'Vertat ictum carnifex  
in os loquentis inque maxillas manum  
550 sulcosque acutos et fidiculas transferat.

Verbositatis ipse rumpatur locus,  
scaturrientes perdat ut loquacitas  
sermonis auras perforatis follibus,  
quibus sonandi nulla lex ponit modum;  
555 ipsa et loquentis uerba torqueri uolo.'

Inplet iubentis dicta lictor inpius;  
charaxat ambas unguis scribentibus  
genas cruentis et secat faciem notis,  
hirsuta barbibus soluitur carptim cutis  
560 et mentum adusque uultus omnis scinditur.

Martyr fluentem fatur inter sanguinem:  
'Grates tibi, o praefecte, magnas debeo,  
quod multa pandens ora iam Christum loquor:  
artabat ampli nominis praeconium  
565 meatus unus, inpar ad laudes dei.

Rimas patentes inuenit uox edita  
multisque fusa rictibus reddit sonos  
hinc inde plures et profatur undique  
Christi patrisque sempiternam gloriam:  
570 tot ecce laudant ora, quot sunt uulnera.'

Tali repressus cognitor constantia  
cessare poenam praecipit, tunc sic ait:  
'Per Solis ignes iuro, qui nostros dies  
reciprocatis administrat circulis,  
575 cuius recursu lux et annus ducitur,

ignes parandos iam tibi tristis rogi,  
qui fine digno corpus istud deuorent,  
quod perseuerans tam resistit nequiter  
sacris uetustis nec dolorum spiculis  
580 uictum fatiscit fitque poenis fortius.

Quis hunc rigorem pectori iniecit stupor?  
mens obstinata est, corpus omne obcalluit,  
tantus nouelli dogmatis regnat furor:  
hic nempe uester Christus haud olim fuit,  
585 quem tu fateris ipse suffixum cruci.'

'Haec illa crux est omnium nostrum salus',  
Romanus inquit, 'hominis haec redemptio est.  
scio incapacem te sacramenti, inpie,  
non posse caecis sensibus mysterium  
590 haurire nostrum: nil diurnum nox capit.

Tamen in tenebris proferam claram facem,  
sanus uidebit, lippus oculos obteget.  
remouete lumen, dicet insanabilis,  
iniuriosa est nil uidenti claritas.  
595 audi, profane, quod grauatus oderis!

Regem perennem rex perennis protulit  
in se manentem nec minorem tempore,  
quia tempus illum non tenet; nam fons retro  
exordiorum est et dierum et temporum,  
600 ex patre Christus: hoc pater quod filius.

Hic se uidendum praestitit mortalibus,  
mortale corpus sumpsit immortalitas,  
ut, dum caducum portat aeternus deus,  
transire nostrum posset ad caelestia:  
605 homo est peremptus et resurrexit deus.

Congressa mors est membra gestanti deo;  
dum nostra temptat, cessit immortalibus.  
stultum putatis hoc, sofistae saeculi,  
sed stulta mundi summus elegit pater,  
610 ut stultus esset saeculi prudens dei.

Antiquitatem Romuli et Mauortiam  
lupam renarras primum et omen uulturum.  
si res nouellas respuis, nil tam recens:  
uix mille fastis inplet hanc aetatulam  
615 cursus dierum conditore ab augure.

Sescenta possum regna pridem condita  
proferre toto in orbe, si sit otium,  
multo ante clara, quam capellam Gnosiam  
suxisse fertur Iuppiter, Martis pater.  
620 sed illa non sunt, haec et olim non erunt.

Crux ista Christi, quam nouellam dicitis,  
nascente mundo factus ut primum est homo,  
expressa signis, expedita est litteris,  
aduentus eius mille per miracula  
625 praenuntiatus ore uatum consono.

Reges, profetae iudicesque et principes  
uirtute, bellis, cultibus sacris, stilo  
non destiterunt pingere formam crucis,  
crux praenotata, crux adumbrata est prius,  
630 crucem uetusta conbiberunt saecula.

Tandem relectis uocibus profeticis  
aetate nostra conprobata antiquitas  
coram refulsit ore conspicabili,  
ne fluctuaret ueritas dubia fide,  
635 si non pateret teste uisu comminus.

Hinc nos et ipsum non perire credimus  
corpus, sepulcro quod uorandum traditur,  
quia Christus in se mortuum corpus cruci  
secum excitatum uexit ad solium patris  
640 uiamque cunctis ad resurgendum dedit.

Cruce illa nostra est, nos patibulum ascendimus,  
nobis peremptus Christus et nobis deus  
Christus reuersus, ipse qui moriens homo est,  
natura duplex: moritur et mortem domat,  
645 reditque in illud, quod perire nesciat.

Dixisse pauca sit satis de mysticis  
nostrae salutis deque processu spei;  
iam iam silebo: margaritas spargere  
Christi uetamur inter inmundos sues,  
650 lutulenta sanctum ne terant animalia.

Sed quia profunda non licet luctarier  
ratione tecum, consulamus proxima:  
interrogetur ipsa naturalium  
simplex sine arte sensuum sententia,  
655 fuci inperitus fac ut adsit arbiter.

Da septuennem circiter puerum aut minus,  
qui sit fauoris liber et non oderit  
quemquam nec ullum mentis in uitium cadat;  
periclitemur, quid recens infantia  
660 dicat sequendum, quid nouus sapiat uigor.'

Hanc ille sancti martyris uocem libens  
amplexus unum de caterua infantium  
paruum nec olim lacte depulsum capi  
captumque adesse praecipit: 'Quiduis roga',  
665 inquit, 'sequamur, quod probarit pusio.'

Romanus ardens experiri innoxiam  
lactantis oris indolem: 'Filiole', ait,  
'dic, quid uidetur esse uerum et congruens,  
unumne Christum colere et in Christo patrem,  
670 an conprecari mille formarum deos?'

Adrisit infans nec moratus rettulit:  
 'Est quidquid illud, quod ferunt homines deum,  
 unum esse oportet, et, quod uni, est unicum.  
 cum Christus hoc sit, Christus est uerus deus,  
 675 genera deorum multa nec pueri putant.'

Stupuit tyrannus sub pudore fluctuans  
 nec uim decebat innocenti aetatulae  
 inferre leges nec loquenti talia  
 furor sinebat efferatus parcere:  
 680 'Quis auctor', inquit, 'uocis est huius tibi?'

Respondit ille: 'Mater et matri deus:  
 illa ex parente spiritu docta inbibit,  
 quo me inter ipsa pasceret cunabula,  
 ego ut gemellis uberum de fontibus  
 685 lac paruus hausit, Christum et hausit credere.'

'Ergo ipsa mater adsit', exclamat, 'cedo',  
 Asclepiades, 'disciplinae et exitum  
 tristem suae magistra spectet inopia,  
 male eruditi torqueatur funere  
 690 infantis orba, quemque corrumpit, fleat.

Absit, ministros uilis ut muliercula  
 nostros fatiget: quantulus autem dolor  
 uexabit artus mortis auxilio breuis!  
 oculi parientis punientur acrius,  
 695 quam si cruentae membra carpant unguulae.'

Vix haec profatus pusionem praecipit  
 sublime tollant et manu pulsant nates,  
 mox et remota ueste uirgis uerberent  
 tenerumque duris ictibus tergum secent,  
 700 plus unde lactis quam cruoris defluat.

Quae cautis illud perpeti spectaculum,  
 quis ferre possit aeris aut ferri rigor?  
 inpacta quotiens corpus attigerat salix,  
 tenui rubebant sanguine uda uimina,  
 705 quem plaga flerat roscidis liuoribus.

Ferunt minaces uerberantium genas  
 inlacrimasse sponte dimanantibus  
 guttis per ora barbarum frementia,  
 scribas et ipsos et coronam plebium  
 710 proceresque siccis non stetisse uisibus.



At sola mater hisce lamentis caret,  
soli sereno frons renidet gaudio:  
stat in piorum corde pietas fortior  
amore Christi contumax doloribus  
715 firmatque sensum mollis indulgentiae.

Sitire sese paruus exclamauerat—  
animae aestuantis ardor in cruciatibus  
hoc exigebat, lymfae ut haustum posceret—,  
quem torua mater eminus triste intuens  
720 uultu et seueris uocibus sic increpat:

'Puto, inbecillo, nate, turbaris metu  
et te doloris horror adflictum domat.  
non hanc meorum uiscerum stirpem fore  
deo spopondi, non in hanc spem gloriae  
725 te procreaui, cedere ut leto scias.

Aquam bibendam postulas, cum sit tibi  
fons ille uiuus praesto, qui semper fluit  
et cuncta solus inrigat uiuentia,  
intus forisque spiritum et corpus simul,  
730 aeternitatem largiens potantibus.

Venies ad illud mox fluentum, si modo  
animo ac medullis solus ardor aestuet  
uidere Christum, quod semel potum adfatim  
sic sedat omnem pectoris flagrantiam,  
735 uita ut beata iam sitire nesciat.

Hic, hic bibendus, nate, nunc tibi est calix,  
mille in Bethleem quem biberunt paruuli:  
oblita lactis et papillarum inmemor  
aetas amaris, mox deinde dulcibus  
740 refecta poclis mella sumpsit sanguinis.

Exemplum ad istud nitere, o fortis puer,  
generosa prolis matris et potential!  
omnes capaces esse uirtutum pater  
mandauit annos, neminem excepit diem  
745 ipsis triumphos adnuens uagitibus.

Scis, saepe dixi, cum docenti adluderes  
et garrulorum signa uerborum dares,  
Isaac fuisse paruulum patri unicum,  
qui, cum inmolandus aram et ense cerneret,  
750 ultro sacranti colla praebuerit seni.

Narraui et illud nobile ac memorabile  
certamen, una matre quod septem editi  
gessere pueri, sed tamen factis uiri,  
hortante eadem matre in ancipiti exitu,  
755 poenae et coronae sanguini ut ne parcerent.

Videbat ipsos apparatus funerum  
praesens suorum nec mouebatur parens  
laetata, quotiens aut oliuo stridula  
sartago frixum torruisset puberem  
760 dira aut cremasset lamminarum inpressio.

Comam cutemque uerticis reuulserat  
a fronte tortor, nuda testa ut tegmine  
ceruicem adusque dehonestaret caput;  
clamabat illa: 'Patere, gemmis uestiet  
765 apicem hunc corona regio ex diademate.'

Linguam tyrannus amputari iusserat  
uni ex ephybis; mater aiebat: 'Satis  
iam parta nobis gloria est, pars optima  
deo inmolatur ecce nostri corporis,  
770 digna est fidelis lingua, quae sit hostia.

Interpres animi, enuntiatrice sensuum,  
cordis ministra, praeco operti pectoris,  
prima offeratur in sacramentum necis  
et sit redemptrix prima membrorum omnium,  
775 duces dicatam mox sequentur cetera.

His Maccabeos incitans stimulis parens  
hostem subegit subiugatum septies,  
quot feta natis, tot triumphis incluta;  
me partus unus ut feracem gloriae,  
780 mea uita, praestet, in tua est situm manu.

Per huius alui fida conceptacula,  
per hospitalem mense bis quino larem,  
si dulce nostri pectoris nectar tibi,  
si molle gremium, grata si crepundia,  
785 persiste et horum munerum auctorem adsere!

Quanam arte nobis uiuere intus coeperis,  
nihilumque et illud, unde corpus, nescio,  
nouit animator solus et factor tui;  
inpendere ipsi, cuius ortus munere es,  
790 bene in datorem, quod dedit, refuderis.'

Talia canente matre iam laetus puer  
uirgas strepentes et dolorem uerberum  
ridebat. hic tum cognitor pronuntiat:  
‘Claudatur infans carcere et tanti mali  
795 Romanus auctor torqueatur acrius.’

Illum recentes per cicatricum uias  
denuo exarabant, quaque acutum traxerant  
paulo ante ferrum, mox recrudescens  
plagis apertas persequabantur notas,  
800 quos iam superbus uictor ignauos uocat.

‘O non uirile robur, o molles manus,  
unam labantis dissipare tam diu  
uos non potesse fabricam corpusculi!  
uix iam cohaeret nec tamen penitus cadit  
805 uincens lacertos dexterarum inertium.

Citius cadauer dentibus carpunt canes  
longeque morsus uulturum efficacior  
ad deuorandas carnis offas mortuae;  
languetis inbelli fame ac fatiscitis,  
810 gula est ferina sed socors edacitas.’

Exarsit istis turbida ira iudicis  
seque in supremam concitat sententiam:  
‘Si te morarum paenitet, finem citum  
subeas, licebit: ignibus uorabere  
815 damnatus et fauilla iam tenuis fies.’

Abiens at ille, cum foro abriperent uirum  
truces ministri, pone respectans ait:  
‘Appello ab ista, perfide, ad Christum meum  
crudelitate, non metu mortis tremens,  
820 sed ut probetur esse nil, quod iudicas.’

‘Quid differo’, inquit ille, ‘utrosque perdere,  
puerum ac magistrum, complices sectae inopiae?  
gladius recidat uile uix hominis caput  
infantis, istum flamma uindex concremet,  
825 sit his sub uno fine dispar exitus.’

Peruentum ad ipsum caedis implendae locum.  
natum gerebat mater amplexu et sinu,  
ut primitiuum crederes fetum geri  
deo offerendum sancti Abelis ferculo,  
830 lectum ex ouili, puriorem ceteris.

Puerum poposcit carnifex, mater dedit,  
nec inmorata est fletibus, tantum osculum  
inpressit unum: 'Vale', ait, 'dulcissime,  
et, cum beatus regna Christi intraueris,  
835 memento matris, iam patrone ex filio!'

Dixit. deinde, dum ferit ceruiculam  
percussor ense, docta mulier psallere  
hymnum canebat carminis Dauitici:  
'Pretiosa sancti mors sub aspectu dei,  
840 tuus ille seruus, prolis ancillae tuae.'

Talia retexens explicabat pallium  
manusque tendebat sub ictu et sanguine,  
uenarum ut undam profluam manantium  
et palpitantis oris exciperet globum:  
845 excepit et caro adplicauit pectori.

At parte campi ex altera inmanem pyram  
texebat ustor fumidus pinu arida,  
sarmenta mixtim subdita et faeni struem  
spargens liquato rore feruentis picis,  
850 quo flamma pastu cresceret ferocius.

Et iam retortis bracchiis furca eminus  
Romanus actus ingerebatur rogo:  
'Scio', inquit ille, 'non futurum, ut concremer,  
nec passionis hoc genus datum est mihi,  
855 et restat ingens quod fiat miraculum.'

Haec eius orsa sequitur inmensus fragor  
nubis ruentis, nimbus undatim nigro  
praeceps aquarum flumine ignes obruit.  
alunt oliuo semiconbustas faces,  
860 sed uincit imber iam madentem fomitem.

Trepidare teter carnifex rebus nouis  
turbatus et, qua posset arte, insistere,  
uersare torres cum fauillis umidis,  
prunas maniplis confouere stuppeis  
865 et semen ignis inter undas quaerere.

Quod cum tumentis nuntiatum iudici,  
commouit iram fellis implacabilis:  
'Quousque tandem summus hic nobis magus  
inludet', inquit, 'Thessalorum carmine  
870 poenam peritus uertere in ludibrium?'

Fortasse ceruix, si secandam iussero,  
flecti sub ensem non patebit uulneri,  
uel amputatum plaga collum diuidens  
rursus coibit ac reglutinabitur  
875 umerisque uertex eminebit additus.

Temptemus igitur ante partem quampiam  
truncare ferro corporis superstitis,  
ne morte simpla crimosus multiplex  
cadat uel una perfidus caede oppetat:  
880 quot membra gestat, tot modis pereat uolo.

Libet experiri, Lerna, sicut traditur,  
utrum renatis pullulascat artubus  
ac se inminuti corporis damnis nouum  
instauret: ipse praesto erit tunc Hercules  
885 hydrina suetus ustuire uulnera.

Iam nunc secandi doctus adsit artifex,  
qui cuncta norit uiscerum confinia  
uel nexa neruis disparare uincula:  
date hunc, reuulsis qui medetur ossibus  
890 aut fracta nodis sarcimens compaginat.

Linguam priorem detrahat radicitus,  
quae corpore omni sola uiuit nequior;  
illa et procaci pessima in nostros deos  
inuecta motu fas profanauit uetus  
895 audax et ipsi non pepercit principi.'

Aristo quidam medicus accitus uenit,  
proferre linguam praecipit. profert statim  
martyr resectam, pandit ima et faucium  
ille et palatum tractat et digito exitum  
900 uocis pererrans uulneri explorat locum.

Linguam deinde longe ab ore protrahens  
scalpillum in usque guttur insertans agit.  
illo secante fila sensim singula  
numquam momordit martyr aut os dentibus  
905 compressit artis nec cruorem sorbuit.

Inmotus et patente rictu constitit,  
dum sanguis extra defluit scaturriens,  
perfusa pulcher menta russo stemmate  
fert et cruenti pectoris spectat decus  
910 fruiturque et ostro uestis ut iam regiae.

Praefectus ergo ratus elinguem uirum  
 cogi ad sacrandum posse, cum uerbis carens  
 nil in deorum blateraret dedecus,  
 iubet reduci iam tacentem ac debilem  
 915 multo loquentis turbine olim territus.

Reponit aras ad tribunal denuo  
 et tus et ignem uiuidum in carbonibus  
 taurina et exta uel suilla abdomina;  
 ingressus ille, ut hos paratus perspicit,  
 920 insufflat, ipsos ceu uideret daemonas.

Inridet hoc Asclepiades laetior,  
 addit deinde: 'Numquid inclementius,  
 sicut solebas, es paratus dicere?  
 effare quiduis ac perora et dissere;  
 925 permitto, uocem libere ut exerceas.'

Romanus alto corde suspirans diu  
 gemitu querellam traxit et sic orsus est:  
 'Christum loquenti lingua numquam defuit,  
 nec uerba quaeras quo regantur organo,  
 930 cum praedicatur ipse uerborum dator.

Qui fecit, ut uis uocis expressa intimo  
 pulmone et oris torta sub testudine  
 nunc ex palato det repercussos sonos,  
 nunc temperetur dentium de pectine  
 935 sitque his agendis lingua plectrum mobile,

si mandet idem faucium sic fistulas  
 spirare flatu concinentes consono,  
 ut uerba in ipsis explicent meatibus  
 uel exitu oris, cymbalis profarier  
 940 nunc pressa parce labra, nunc hiantia,

dubitasne uerti posse naturae statum,  
 cui facta forma est, qualis esset primitus?  
 hanc nempe factor uertere, ut libet, potest  
 positasque leges texere ac retexere,  
 945 linguam loquella ne ministram postulet.

Vis scire nostri numinis potentiam?  
 fluctus liquentis aequoris pressit pede,  
 natura fluxa ac tenuis in solidum coit:  
 quam dispar illis legibus, quis condita est!  
 950 solet natatus ferre, fert uestigia.

Habet usitatum munus hoc diuinitas,  
quae uera nobis colitur in Christo et patre,  
mutis loquellam, percitum claudis gradum,  
surdis fruendam reddere audientiam,  
955 donare caecis lucis insuetae diem.

Haec si quis amens fabulosa existimat,  
uel ipse tute si parum fidelia  
rebare pridem, uera cognoscas licet:  
habes loquentem, cuius amputaueras  
960 linguam: probatis cede iam miraculis.'

Horror stupentem persecutorem subit  
timorque et ira pectus in caliginem  
uertere: nescit, uigilet ane somniet,  
miratur haerens, quod sit ostenti genus:  
965 formido frangit, armat indignatio.

Nec uim domare mentis effrenae potest  
nec, quo furoris tela uertat, inuenit.  
postremo medicum saeuus insontem iubet  
reum citari, nundinatum hunc arguit,  
970 mercede certa pactus ut conluderet,

aut ferrum in ore nil agens et irritum  
uersasse frustra seu retunsis tactibus  
aut arte quadam uulnus inlatum breue,  
quod sauciata parte linguam laederet  
975 neruos nec omnes usque quaque abscideret.

Manere saluam uocis harmoniam probe  
non posse, inani concauo uerba exprimi,  
quae concrepare ligula moderatrix facit.  
esto, ut resultet spritus uacuo specu,  
980 echo sed extat inde, non oratio.

Veris refutat medicus hanc calumniam:  
'Scrutare uel tu nunc latebras faucium  
intraque dentes curiosum pollicem  
circumfer haustus uel patentes inspice,  
985 lateatne quidquam, quod regat spiramina.

Quamquam forassem forte si puncto leui  
tenuiue linguam contigissem uulnere,  
titubante plectro fatus esset debilis;  
nam cum magistra uocis in uitium cadit,  
990 usus necesse est et loquendi intercidat.

Fiat periculum, si placet, cuiusmodi  
edat querellam quadrupes lingua eruta,  
elinguis et quem porca grunitum strepat,  
cui uox fragosa, clamor est inconditus,  
995 probabo mutam nil sonare stridulum.

Testor salutem principis me simplici  
functum secantis arte, iudex optime,  
seruisse iussis absque fraude publicis;  
sciat hic, quis illi uerba suggillet deus,  
1000 ego, unde mutus sit disertus, nescio.'

His sese Aristo purgat, at contra inpium  
nil haec latronem christianorum mouent,  
magis magisque fertur in uesaniem.  
quaerit, alienus sanguis ille aspenderit  
1005 uirum, suone fluxerit de uulnere.

Respondit his Romanus: 'Eccum, praesto sum,  
meus iste sanguis uerus est, non bubulus.  
agnoscis illum, quem loquor, miserrime  
pagane, uestri sanguinem sacrum bouis,  
1010 cuius litata caede permadescitis?

Summus sacerdos nempe sub terram scrobe  
acta in profundum consecrandus mergitur,  
mire infulatus festa uittis tempora  
nectens, corona tum repexus aurea,  
1015 cinctu Gabino sericam fultus togam.

Tabulis superne strata texunt pulpita  
rimosa rari pegmatis conpagibus,  
scindunt subinde uel terebrant aream  
crebroque lignum perforant acumine,  
1020 pateat minutis ut frequens hiatibus.

Huc taurus ingens fronte torua et hispida  
sertis reuinctus aut per armos floreis  
aut inpeditis cornibus deducitur,  
nec non et auro frons coruscat hostiae  
1025 saetasque fulgor brattealis inficit.

Hic ut statuta est inmolanda belua,  
pectus sacrato diuidunt uenabulo;  
eructat amplum uulnus undam sanguinis  
feruentis inque texta pontis subditi  
1030 fundit uaporum flumen et late aestuat.



Tum per frequentes mille rimarum uias  
inlapsus imber tabidum rorem pluit,  
defossus intus quem sacerdos excipit  
guttas ad omnes turpe subiectans caput  
1035 et ueste et omni putrefactus corpore.

Quin os supinat, obuias offert genas,  
supponit aures, labra, nares obicit,  
oculos et ipsos perluit liquoribus,  
1040 nec iam palato parcit et linguam rigat,  
donec cruorem totus atrum conbibat.

Postquam cadauer sanguine egesto rigens  
conpage ab illa flamines retraxerint,  
procedit inde pontifex uisu horridus,  
ostentat udum uerticem, barbam grauem,  
1045 uittas madentes atque amictus ebrios.

Hunc inquinatum talibus contagiis,  
tabo recentis sordidum piaculi,  
omnes salutant atque adorant eminus,  
uilis quod illum sanguis et bos mortuus  
1050 foedis latentem sub cauernis lauerint.

Addamus illam, uis, hecatomben tuam,  
centena ferro cum cadunt animalia  
uariaque abundans caede restagnat cruor,  
uix ut cruentis augures natatibus  
1055 possint meare per profundum sanguinis?

Sed quid macellum pingue puluinarium,  
quid maximorum lancinatores gregum  
euiscerata carne crudos criminor?  
sunt sacra, quando uosmet ipsi exciditis,  
1060 uotiuus et cum membra detruncat dolor.

Cultrum in lacertos exerit fanaticus  
sectisque Matrem bracchiis placat deam,  
furere ac rotari ius putatur mysticum;  
parca ad secandum dextra fertur in pia,  
1065 caelum meretur uulnerum crudelitas.

Ast hic metenda dedicat genitalia,  
numen reciso mitigans ab inguine  
offert pudendum semiuir donum deae,  
illam reuulsa masculini germinis  
1070 uena effluenti pascit auctam sanguine.

Vterque sexus sanctitati displicet,  
medium retentat inter alternum genus,  
mas esse cessat ille nec fit femina.  
felix deorum mater inberbes sibi  
1075 parat ministros lenibus nouaculis.

Quid, cum sacrandus accipit sfragitidas?  
acus minutas ingerunt fornacibus,  
his membra pergunt urere, ut igniuerint;  
quamcumque partem corporis feruens nota  
1080 stigmatit, hanc sic consecratam praedicant.

Functum deinde cum reliquit spiritus  
et ad sepulcrum pompa fertur funeris,  
partes per ipsas inprimuntur bratteae,  
insignis auri lammina obducit cutem,  
1085 tegitur metallo, quod perustum est ignibus.

Has ferre poenas cogitur gentilitas,  
hac dii coercent lege cultores suos:  
sic daemon ipse ludit hos, quos ceperit,  
docet execrandas ferre contumelias,  
1090 tormenta inuri mandat infelicibus.

At noster iste sanguis ex uestra fluit  
crudelitate, uos tyrannide inopia  
exulceratis innocentum corpora.  
si uos sinatis, incruente uiuimus,  
1095 at si cruenta puniamur, uincimus.

Sed iam silebo, finis instat debitus,  
finis malorum, passionis gloria,  
iam non licebit, inprobe, ut licuit modo,  
torquere nostra uel secare uiscera,  
1100 cedas necesse est uictus et iam desinas.'

'Cessabit equidem tortor et sector dehinc',  
iudex minatur, 'sed peremptoris manus  
succedet illis, strangulatrix faucium,  
aliter silere nescit oris garruli  
1105 uox inquieta, quam tubam si fregero.'

Dixit foroque protrahi iussit uirum,  
trudi in tenebras noxialis carceris,  
elidit illic fune collum martyris  
lictor nefandus. sic peracta est passio,  
1110 anima absoluta uinculis caelum petit.

Gesta intimasse cuncta fertur principi  
praefectus addens ordinem uoluminum  
seriemque tantae digerens tragoediae,  
laetatus omne crimen in fasces refert  
1115 suum tyrannus chartulis uiuacibus.

Illas sed aetas conficit diutina,  
fuligo fuscatur, puluis obducit situ,  
carpit senectus aut ruinis obruit;  
1120 inscripta Christo pagina immortalis est  
nec obsolescit ullus in caelis apex.

Excepit adstans angelus coram deo  
et quae locutus martyr et quae pertulit,  
nec uerba solum disserentis condidit,  
1125 sed ipsa pingens uulnera expressit stilo  
laterum, genarum pectorisque et faucium.

Omnis notata est sanguinis dimensio,  
ut quamque plagam sulcus exarauerit,  
altam, patentem, proximam, longam, breuem,  
1130 quae uis doloris quique segmenti modus,  
guttam cruoris ille nullam perdidit.

Hic in regeis est liber caelestibus,  
monumenta seruans laudis indelebilis,  
relegendus olim sempiterno iudici,  
1135 libramine aequo qui malorum pondera  
et praemiorum comparabit copias.

Vellem sinister inter haedorum greges  
ut sum futurus, eminus dinoscerer  
atque hoc precante diceret rex optimus:  
1140 'Romanus orat, transfer hunc haedum mihi,  
sit dexter, agnus induatur uellere.'



# XI

## AD VALERIANUM

### EPISCOPUM DE PASSIONE

### HIPPOLYTI BEATISSIMI

### MARTYRIS

Innumeros cineres sanctorum Romula in urbe  
uidimus, o Christi Valeriane sacer.  
Incisos tumulis titulos et singula quaeris  
nomina: difficile est, ut replicare queam.  
5 Tantos iustorum populos furor inpius hausit,  
cum coleret patrios Troia Roma deos.  
Plurima litterulis signata sepulcra loquuntur  
martyris aut nomen aut epigramma aliquod,  
sunt et muta tamen tacitas claudentia tumbas  
10 marmora, quae solum significant numerum.  
Quanta uirum iaceant congestis corpora aceruis,  
nosse licet, quorum nomina nulla legas.  
Sexaginta illic defossas mole sub una  
reliquias memini me didicisse hominum,  
15 quorum solus habet conperta uocabula Christus,  
utpote quos propriae iunxit amicitiae.  
Haec dum lustris oculis et sicubi forte latentes  
rerum apices ueterum per monumenta sequor,  
inuenio Hippolytum, qui quondam scisma Nouati  
20 presbiter attigerat nostra sequenda negans,  
usque ad martyrii prouectum insigne tulisse  
lucida sanguinei praemia supplicii.  
Nec mirere senem peruersi dogmatis olim  
munere ditatum catholicae fidei.  
25 Cum iam uaesano uictor raperetur ab hoste  
exultante anima carnis ad exitium,  
plebis amore suae multis comitantibus ibat;  
consultus quaenam secta foret melior,  
respondit: 'Fugite, o miseri, execranda Nouati  
30 scismata, catholicis reddite uos populis!  
Vna fides uigeat, prisco quae condita templo est,  
quam Paulus retinet quamque cathedra Petri.  
Quae docui, docuisse piget: uenerabile martyr

cerno, quod a cultu rebar abesse dei.  
 35 His ubi detorsit laeuo de tramite plebem  
 monstrauitque sequi, qua uia dextra uocat,  
 seque ducem recti spretis anfractibus idem  
 praebuit, erroris qui prius auctor erat,  
 sistitur insano rectori christicolas tunc  
 40 ostia uexanti per Tiberina uiros.  
 Illo namque die Roma secesserat, ipsos  
 peste suburbanos ut quateret populos,  
 non contentus humum celsae intra moenia Romae  
 tingere iustorum caedibus assiduis.  
 45 Ianiculum cum iam madidum, fora, rostra, Suburam  
 cerneret eluuie sanguinis affluere,  
 protulerat rabiem Tyrreni ad litoris oram  
 quaeque loca aequoreus proxima portus habet.  
 Inter carnifices et constipata sedebat  
 50 officia extracto celsior in solio,  
 discipulos fidei detestandique rebelles  
 idolii ardebat dedere perfidiae.  
 Carcereo crinita situ stare agmina contra  
 iusserat horrendis excrucienda modis.  
 55 Inde catenarum tractus, hinc lorea flagra  
 stridere, uirgarum concrepitare fragor,  
 ungula fixa cauis costarum cratibus altos  
 pandere secessus et lacerare iecur.  
 Ac iam lassatis iudex tortoribus ibat  
 60 in furias cassa cognitione fremens—  
 nullus enim Christi ex famulis per tanta repertus  
 supplicia, auderet qui uitare animam—  
 inde furens quaesitor ait: 'Iam, tortor, ab unco  
 desine, si uana est quaestio, morte agito.  
 65 Huic abscede caput, crux istum tollat in auras  
 uiuentesque oculos offerat alitibus;  
 hos rape praecipites et uinctos conice in ignem,  
 sit pyra, quae multos deuoret una reos.  
 En tibi, quos properes rimosae inponere cumbae  
 70 pellere et in medii stagna profunda freti.  
 Quos ubi susceptos rabidum male suta per aequor  
 uexerit et tumidis caesa labarit aquis,  
 dissociata putrem laxent tabulata carinam  
 conceptumque bibant undique naufragium.  
 75 Squamea caenoso praestabit uentre sepulcrum  
 belua consumptis cruda cadaueribus.'  
 Haec persultanti celsum subito ante tribunal  
 offertur senior nexibus implicitus.  
 Stipati circum iuuenes clamore ferebant  
 80 ipsum christicolis esse caput populis:  
 si foret extinctum propere caput, omnia uulgi

pectora Romanis sponte sacranda deis.  
 Insolitum leti poscunt genus et noua poenae  
 inuenta, exemplo quo trepident alii.  
 85 Ille supinata residens ceruice: 'Quis', inquit,  
 'dicitur?' adfirmant dicier Hippolytum.  
 'Ergo sit Hippolytus, quatiat turbetque iugales  
 intereatque feris dilaceratus equis.'  
 Vix haec ille, duo cogunt animalia freni  
 90 ignara insueto subdere colla iugo,  
 non stabulis blandiue manu palpata magistri  
 imperiumque equitis ante subacta pati,  
 sed campestre uago nuper pecus e grege captum,  
 quod pauor indomito corde ferinus agit.  
 95 Iamque reluctantes sociarant uincla bigas  
 oraue discordi foedere nexuerant:  
 temonis uice funis inest, qui terga duorum  
 diuidit et medius tangit utrumque latus,  
 deque iugo in longum se post uestigia retro  
 100 protendens trahitur transit et ima pedum.  
 Huius ad extremum, sequitur qua puluere summo  
 cornipedum refugas orbita trita uias,  
 crura uiri innectit laqueus nodoque tenaci  
 adstringit plantas cumque rudente ligat.  
 105 Postquam conposito satis instruxere paratu  
 martyris ad poenam uerbera, uincla, feras,  
 instigant subitis clamoribus atque flagellis  
 iliaque infestis perfodiunt stimulis.  
 Vultima uox audita senis uenerabilis haec est:  
 110 'Hi rapiant artus, tu rape, Christe, animam!'  
 Prorumpunt alacres caecoque errore feruntur,  
 qua sonus atque tremor, qua furor exagitant.  
 Incendit feritas, rapit impetus et fragor urget  
 nec cursus uolucer mobile sentit onus.  
 115 Per siluas, per saxa ruunt, non ripa retardat  
 fluminis aut torrens oppositus cohibet,  
 prosternunt saepes et cuncta obstacula rumpunt,  
 prona, fragosa petunt, ardua transiliunt.  
 Scissa minutatim labefacto corpore frusta  
 120 carpit spinigeris stirpibus hyrtus ager.  
 Pars summis pendet scopulis, pars sentibus haeret,  
 parte rubent frondes, parte madescit humus.  
 Exemplar sceleris paries habet inlitus, in quo  
 multicolor fucus digerit omne nefas,  
 125 picta super tumulum species liquidis uiget umbris  
 effigians tracti membra cruenta uiri.  
 Rorantes saxorum apices uidi, optime papa,  
 purpureasque notas uepribus inpositas.  
 Docta manus uirides imitando effingere dumos

luserat et minio russeolam saniem.  
Cernere erat ruptis conpagibus ordine nullo  
membra per incertos sparsa iacere situs.  
Addiderat caros gressu lacrimisque sequentes,  
deuia quo fractum semita monstrat iter.  
135 Maerore attoniti atque oculis rimantibus ibant  
inplebantque sinus uisceribus laceris.  
Ille caput niueum conplectitur ac reuerendam  
canitiem molli confouet in gremio;  
hic umeros truncasque manus et bracchia et ulnas  
140 et genua et crurum fragmina nuda legit.  
Palliolis etiam bibulae siccantur harenae,  
ne quis in infecto puluere ros maneat.  
Si quis et in sudibus recalenti aspergine sanguis  
insidet, hunc omnem spongia pressa rapit.  
145 Nec iam densa sacro quidquam de corpore silua  
obtinere aut plenis fraudat ab exequiis.  
Cumque recensetis constaret partibus ille,  
corporis integri qui fuerat numerus,  
nec purgata aliquid deberent auia toto  
150 ex homine extersis frondibus et scopulis,  
metando eligitur tumulo locus, ostia relinquunt,  
Roma placet, santos quae teneat cineres.  
Haud procul extremo culta ad pomeria uallo  
mersa latebrosis crypta patet foueis.  
155 Huius in occultum gradibus uia prona reflexis  
ire per anfractus luce latente docet.  
Primas namque fores summo tenus intrat hiatu  
inlustratque dies limina uestibuli.  
Inde ubi progressu facili nigrescere uisa est  
160 nox obscura loci per specus ambiguum,  
occurrunt celsis inmissa foramina tectis,  
quae iaciant claros antra super radios.  
Quamlibet ancipites texant hinc inde recessus  
arta sub umbrosis atria porticibus,  
165 at tamen excisi subter caua uiscera montis  
crebra terebrato fornice lux penetrat.  
Sic datur absentis per subterranea solis  
cernere fulgorem luminibusque frui.  
Talibus Hippolyti corpus mandatur opertis,  
170 propter ubi adposita est ara dicata deo.  
Illa sacramenti donatrix mensa eademque  
custos fida sui martyris adposita  
seruat ad aeterni spem uindicis ossa sepulcro,  
pascit item sanctis Tibricolas dapibus.  
175 Mira loci pietas et prompta precantibus ara  
spes hominum placida prosperitate iuuat.  
Hic corruptelis animique et corporis aeger



orai quotiens stratus, opem merui.  
 Quod laetor reditu, quod te, uenerande sacerdos,  
 180 conplecti licitum est, scribo quod haec eadem,  
 Hippolyto scio me debere, deus cui Christus  
 posse dedit, quod quis postulet, adnuere.  
 Ipsa, illas animae exuuias quae continet intus,  
 aedacula argento fulgurat ex solido.  
 185 Praefixit tabulas diues manus aequore leuui  
 candentes, recauum quale nitet speculum,  
 nec Pariis contenta aditus obducere saxis  
 addidit ornando clara talenta operi.  
 Mane salutatum concurritur: omnis adorat  
 190 pubis, eunt, redeunt solis adusque obitum.  
 Conglobat in cuneum Latios simul ac peregrinos  
 permixtim populos religionis amor.  
 Oscula perspicuo figunt inpressa metallo,  
 balsama defundunt, fletibus ora rigant.  
 195 Iam cum se renouat decursis mensibus annus  
 natalemque diem passio festa refert,  
 quanta putas studiis certantibus agmina cogi  
 quaeue celebrando uota coire deo!  
 Vrbs augusta suos uomit effunditque Quirites,  
 200 una et patricios ambitione pari.  
 Confundit plebeia falanx umbonibus aequis  
 discrimen procerum praecipitante fide.  
 Nec minus Albanis acies se candida portis  
 explicat et longis ducitur ordinibus,  
 205 exultant fremitus uariarum hinc inde uiarum,  
 indigena et Picens plebs et Etrusca uenit.  
 Concurrat Samnitis atrox, habitator et altae  
 Campanus Capuae iamque Nolanus adest,  
 quisque sua laetus cum coniuge dulcibus et cum  
 210 pigneribus rapidum carpere gestit iter.  
 Vix capiunt patuli populorum gaudia campi  
 haeret et in magnis densa cohors spatii.  
 Angustum tantis illud specus esse cateruis  
 haud dubium est, ampla fauce licet pateat.  
 215 Stat sed iuxta aliud, quod tanta frequentia templum  
 tunc adeat cultu nobile regifico,  
 parietibus celsum sublimibus atque superba  
 maiestate potens muneribusque opulens.  
 Ordo columnarum geminus laquearia tecti  
 220 sustinet auratis suppositus trabibus.  
 Adduntur graciles tecto breuiore recessus,  
 qui laterum seriem iugiter exsinuent.  
 At medios aperit tractus uia latior alti  
 culminis exurgens editiore apice.  
 225 Fronte sub aduersa gradibus sublime tribunal

tollitur, antistes praedicat unde deum.  
Plena laborantes aegre domus accipit undas  
artaque confertis aestuat in foribus  
maternum pandens gremium, quo condat alumnos  
230 ac foueat fetos adcumulata sinus.  
Si bene commemini, colit hunc pulcherrima Roma  
Idibus Augusti mensis, ut ipsa uocat  
prisco more diem, quem te quoque, sancte magister,  
annua festa inter dinumerare uelim.  
235 Crede, salutigeros feret hic uenerantibus ortus  
lucis honoratae praemia restituens.  
Inter solemnes Cypriani uel Chelidoni  
Eulaliaeque dies currat et iste tibi.  
Sic te pro populo, cuius tibi credita uita est,  
240 orantem Christus audiat omnipotens;  
sic tibi de pleno lupo excludatur ouili  
agna nec ulla tuum capta gregem minuat;  
sic me gramineo remanentem denique campo  
sedulus aegrotam pastor ouem referas;  
245 sic, cum lacteolis caulas compleueris agnis,  
raptus et ipse sacro sis comes Hippolyto.

# XII

## PASSIO APOSTOLORUM PETRI ET PAULI

Plus solito coeunt ad gaudia; dic, amice, quid sit!  
Romam per omnem cursitant ouantque.  
Festus Apostolici nobis redit hic dies triumfi,  
Pauli atque Petri nobilis cruore.  
5 Vnus utrumque dies, pleno tamen innouatus anno,  
uidit superba morte laureatum.  
Scit Tiberina palus, quae flumine lambitur propinquo,  
binis dicatum caespitem tropeis,  
et crucis et gladii testis, quibus inrigans easdem  
10 bis fluxit imber sanguinis per herbas.  
Prima Petrum rapuit sententia legibus Neronis,  
pendere iussum praeminente ligno.  
Ille tamen ueritus celsae decus aemulando mortis  
ambire tanti gloriam magistri  
15 exigit, ut pedibus mersum caput inprimant supinis,  
quo spectet imum stipitem cerebro.  
Figitur ergo manus subter, sola uersus in cacumen,  
hoc mente maior, quo minor figura.  
Nouerat ex humili caelum citius solere adiri,  
20 deiecit ora spiritum daturus.  
Ut teres orbis iter flexi rota percucurrit anni  
diemque eundem sol reduxit ortus,  
euomit in iugulum Pauli Nero feruidum furorem,  
iubet feriri gentium magistrum.  
25 Ipse prius sibimet finem cito dixerat futurum:  
'Ad Christum eundum est, iam resoluor', inquit.  
Nec mora, protrahitur, poenae datur, inmolatur ense,  
non hora uatem, non dies fefellit.  
Diuidit ossa duum Tybris sacer ex utraque ripa,  
30 inter sacrata dum fluit sepulcra.  
Dextra Petrum regio tectis tenet aureis receptum  
canens oliua, murmurans fluento;  
namque supercilio saxi liquor ortus excitauit  
fontem perennem chrismatis feracem,  
35 nunc pretiosa ruit per marmora lubricatque cliuum,  
donec uirenti fluctuet colymbo.  
Interior tumuli pars est, ubi lapsibus sonoris  
stagnum niuali uoluitur profundo.

40 Omnicolor uitreas pictura superne tinguit undas,  
musci relucent et uirescit aurum  
cyaneusque latex umbram trahit imminentis ostri:  
credas moueri fluctibus lacunar.  
Pastor oues alit ipse illic gelidi rigore fontis,  
uidet sitire quas fluenta Christi.  
45 Parte alia titulum Pauli uia seruat Ostiensis,  
qua stringit amnis caespitem sinistrum.  
Regia pompa loci est, princeps bonus has sacrauit arces  
lusitque magnis ambitum talentis.  
Bratteolas trabibus subleuit, ut omnis aurulenta  
50 lux esset intus, ceu iubar sub ortu.  
subdidit et Parias fuluis laquearibus columnas,  
distinguit illic quas quaternus ordo.  
Tum camiros hyalo insigni uarie cucurrit arcus:  
sic prata uernis floribus renident.  
55 Ecce duas fidei summo patre conferente dotes,  
urbi colendas quas dedit togatae.  
Aspice, per bifidas plebs Romula funditur plateas,  
lux in duobus feruet una festis.  
Nos ad utrumque tamen gressu properemus incitato,  
60 et his et illis perfruamur hymnis.  
Ibimus ulterius, qua fert uia pontis Hadriani,  
laeuam deinde fluminis petemus.  
Transtiberina prius soluit sacra peruigil sacerdos,  
mox huc recurrit duplicatque uota.  
65 Haec didicisse sat est Romae tibi: tum domum reuersus  
diem bifestum sic colas memento.'

# XIII

## PASSIO CYPRIANI

Punica terra tulit, quo splendeat omne, quidquid usquam est,  
inde domo Cyprianum, sed decus orbis et magistrum.  
Est proprius patriae martyr, sed amore et ore noster,  
incubat in Libya sanguis, sed ubique lingua pollet,  
5 sola superstes agit de corpore, sola obire nescit,  
dum genus esse hominum Christus sinet et uigere mundum.  
Dum liber ullus erit, dum scrinia sacra litterarum,  
te leget omnis amans Christum, tua, Cypriane discet.  
Spiritus ille dei, qui fluxerat auctor in profetas,  
10 fontibus eloquii te caelitus actus inrigauit.  
O niue candidius linguae genus, o nouum saporem!  
ut liquor ambrosius cor mitigat, inbuit palatum,  
sedem animae penetrat, mentem fouet et pererrat artus,  
sic deus interius sentitur et inditur medullis.  
15 Vnde bonum subitum terris dederis, pater, reuela!  
Derat apostolicis scriptis opulentus executor,  
eligitur locuples facundia, quae doceret orbem  
quaeque uoluminibus Pauli famulata disputaret,  
quo mage cruda hominum praecordia perpolita nossent  
20 siue timoris opus seu mystica uel profunda Christi.  
Vnus erat iuuenum doctissimus artibus sinistris:  
fraude pudicitiam perfringere, nil sacrum putare,  
saepe etiam magicum cantamen inire per sepulcra,  
quo geniale tori ius solueret aestuante nupta.  
25 Luxuriae rabiem tantae cohibet repente Christus,  
discutit et tenebras de pectore, pellit et furorem,  
inplet amore sui, dat credere, dat pudere facti.  
Iamque figura alia est, quam quae fuit, oris et nitoris:  
exuitur tenui uultus cute, transit in seueram,  
30 deflua caesaries conpescitur ad breues capillos,  
ipse modesta loqui, spem quaerere, regulam tenere,  
uiuere iustitia Christi, penetrare dogma nostrum.  
His igitur meritis dignissimus usque episcopale  
prouehitur solium doctor, capit et sedile summum.  
35 Valerianus opum princeps erat atque Gallienus:  
constituere simul poenam capitis deum fatenti.  
Milia terrigenum spurcissima iusserant sacrari;  
contra animos populi doctor Cyprianus incitabat,  
ne quis ab egregiae uirtutis honore discreparet  
40 neu fidei pretium quis sumere degener timeret.

Esse leuem cruciatum, si modo conferas futura,  
 quae deus ipse uiris intermina fortibus spondit,  
 merce doloris emi spem luminis et diem perennem,  
 omne malum uolucris cum tempore transuolare cursim,  
 45 nil graue, quod peragi finis facit et quiete donat.  
 Se fore principium pulchrae necis et duces cruoris  
 seque caput gladio submittere, sanguinem dicare;  
 qui sociare animam Christo uelit, ut comes sequatur.  
 His ubi corda uirum Christo calefacta praeparauit,  
 50 ducitur ante alios proconsule perfurente uinctus.  
 Antra latent Tyriae Carthaginis abditis reposita,  
 conscia tartareae caliginis, abdicata soli.  
 Clausus in his specubus sanctus Cyprianus et catena  
 nexus utramque manum nomen patris inuocat supremi:  
 55 'Omnipotens genitor Christi deus et creator orbis,  
 Christe, parens hominis, quem diligis et uetas perire!  
 Ille ego, uipereis quem tu bonus oblitum uenenis,  
 criminibus uariis tinctum miseratus abluisti  
 iamque tuum fieri mandas, fio Cyprianus alter  
 60 et nouus ex ueteri nec iam reus aut nocens, ut ante.  
 Si luteum facili charismate pectus expiasti,  
 uise libens tenebris ergastula caeca dissipatis,  
 eripe corporeo de carcere uinculisque mundi  
 hanc animam, liceat fuso tibi sanguine inmolari,  
 65 ne qua ferum reprimat clementia iudicem, tyranni  
 neu sciat inuidia mitescere, gloriam negare.  
 Da quoque, ne quis iners sit de grege, quem tuum regebam,  
 ne cadat inpatiens poenae titubetue quis tuorum,  
 incolumem ut numerum reddam tibi debitumque soluam.'  
 70 Vocibus his dominum permouerat, influebat inde  
 spiritus in populum Carthaginis, auctor acrioris  
 ingenii, stimulis ut pectora subditis calerent  
 ad decus egregium discrimine sanguinis petendum,  
 non trepidare docens nec cedere nec dolore uinci,  
 75 laudis amore rapi, Christum sapere et fidem tueri.  
 Fama refert foueam campi in medio patere iussam,  
 calce uaporifera summos prope margines refertam;  
 saxa recocta uomunt ignem niueusque puluis ardet,  
 urere tacta potens et mortifer ex odore flatus.  
 80 Adpositam memorant aram fouea stetisse summa  
 lege sub hac: salis aut micam iecur aut suis litarent  
 christicolae aut mediae sponte inruerent in ima fossae.  
 Prosiluere alacres cursu rapido simul trecenti,  
 gurgite puluereo mersos liquor aridus uorauit  
 85 praecipitemque globum fundo tenus implicauit imo.  
 Corpora candor habet, candor uehit ad superna mentes,  
 'candida massa' dehinc dici meruit per omne saeculum.  
 Laetior interea iam Thascius ob diem suorum

sistitur indomiti proconsulis eminus furori.

90 Edere iussus erat, quid uiueret: 'Vniculor', unquit,  
'trado salutiferi mysteria consecrata Christi.'

Ille sub haec: 'Satis est iam criminis, ipse confitetur  
Thascius, ipse Iouis fulmen negat, expedite ferrum,  
carnifices, gladio poenam luat hostis idolorum.'

95 Ille deo meritas grates agit et canit triumphans.

Fleuit abire uirum maesta Africa, quo docente facta est  
cultior, eloquio cuius sibi docta gloriatur;

mox tumulum lacrimans struxit cineresque consecrauit.

Desine flere bonum tantum, tenet ille regna caeli

100 nec minus inuolitat terris nec ab hoc recedit orbe:

disserit, eloquitur, tractat, docet, instruit, profetat.

Nec Libyae populos tantum regit, exit usque in ortum

solis et usque obitum, Gallos fouet, inbuit Britannos,

praesidet Hesperiae, Christum serit ultimis Hiberis,

105 denique doctor humi est, idem quoque martyr in supernis,  
instruit hic homines, illinc pia dona dat patronus.





# XIV

## PASSIO AGNETIS

Agnes sepulcrum est Romulea in domo,  
fortis puellae, martyris inclytæ.  
Conspectu in ipso condita turrium  
seruat salutem uirgo Quiritium  
5 nec non et ipsos protegit aduenas  
puro ac fideli pectore supplices.  
Duplex corona est praestita martyri:  
intactum ab omni crimine uirginal,  
mortis deinde gloria liberae.  
10 Aiunt iugali uix habilem toro  
primis in annis forte puellulam  
Christo calentem fortiter inpiis  
iussis renisam, quo minus idolis  
addicta sacram desereret fidem.  
15 Temptata multis nam prius artibus,  
tunc ore blandi iudicis inlice,  
nunc saeuientis carnificis minis  
stabat feroci robure pertinax  
corpusque duris excruciatibus  
20 ultro offerebat non renuens mori.  
Tum trux tyrannus: 'Si facile est', ait,  
'poenam subactis ferre doloribus  
et uita uilis spernitur, at pudor  
carus dicatae uirginitatis est.  
25 Hanc in lupanar trudere publicum  
certum est, ad aram ni caput applicat  
ac de Minerua iam ueniam rogat.  
quam uirgo pergit temnere uirginem:  
omnis iuuentus inruet et nouum  
30 ludibriorum mancipium petet.'  
'Haud', inquit Agnes, 'inmemor est ita  
Christus suorum, perdat ut aureum  
nobis pudorem, nos quoque deserat;  
praesto est pudicis nec patitur sacrae  
35 integritatis munera pollui.  
Ferrum inpiabis sanguine, si uoles,  
non inquinabis membra libidine.'  
Sic elocutam publicitus iubet  
flexu in plateae sistere uirginem.  
40 Stantem refugit maesta frequentia,

auersa uultus, ne petulantius  
quisquam uerendum conspiceret locum.  
Intendit unus forte procaciter  
os in puellam nec trepidat sacram  
45 spectare formam lumine lubrico.  
En ales ignis fulminis in modum  
uibratur ardens atque oculos ferit,  
caecus corusco lumine corruiat  
atque in plateae puluere palpitat.  
50 Tollunt sodales seminecem solo  
uerbisque deflent exequialibus.  
Ibat triumphans deum patrem  
Christumque sacro carmine concinens,  
quod sub profani labe periculi  
55 castum lupanar nec uiolabile  
experta uictrix uirginitas foret.  
Sunt, qui rogatam rettulerint preces  
fudisse Christo, redderet ut reo  
lucem iacenti: tunc iuueni halitum  
60 uitae innouatum uisibus integris.  
Primum sed Agnes hunc habuit gradum  
caelestis aulae, mox alius datur  
ascensus; iram non furor incitat  
hostis cruenti: 'Vincor', ait gemens,  
65 'i, stringe ferrum, miles, et exere  
praecepta summi regia principis!'  
Vt uidit Agnes stare trucem uirum  
mucrone nudo, laetior haec ait:  
'Exulto, talis quod potius uenit,  
70 uaesanus, atrox, turbidus armiger,  
quam si ueniret languidus ac tener  
mollisque efybus tinctus aromate,  
qui me pudoris funere perderet.  
Hic, hic amator iam, fateor, placet;  
75 ibo inruentis gressibus obuiam  
nec demorabor uota calentia:  
ferrum in papillas omne recepero  
pectusque ad imum uim gladii traham.  
Sic nupta Christo transilium poli  
80 omnes tenebras aethere celsior.  
Aeterne rector, diuide ianuas  
caeli obseratas terrigenis prius  
ac te sequentem, Christe, animam uoca,  
cum uirginalem, tum patris hostiam!'  
85 Sic fata Christum uertice cernuo  
supplex adorat, uulnus ut inminens  
ceruix subiret prona paratius.  
Ast ille tantam spem peragit manu,

90 uno sub ictu nam caput amputat,  
sensum doloris mors cita praeuenit.  
Exutus inde spiritus emicat  
liberque in auras exilit, angeli  
saepsere euntem tramite candido.  
Miratur orbem sub pedibus situm,  
95 spectat tenebras ardua subditas  
ridetque, solis quod rota circuit,  
quod mundus omnis uoluit et implicat,  
rerum quod atro turbine uiuitur,  
quod uana saeculi mobilitas rapit:  
100 reges, tyrannos, imperia et gradus  
pompaque honorum stulta tumentium,  
argenti et auri uim rabida siti  
cunctis petitam per uarium nefas,  
splendore multo structa habitacula,  
105 inclusa pictae uestis inania,  
iram, timorem, uota, pericula,  
nunc triste longum, nunc breue gaudium,  
liuoris atrii fumificas faces,  
nigrescit unde spes hominum et decus,  
110 et, quod malorum taetrius omnium est,  
gentilitatis sordida nubila.  
Haec calcat Agnes ac pede proterit  
stans et draconis calce premens caput,  
terrena mundi qui feros omnia  
115 spargit uenenis mergit et inferis,  
nunc uirginali perdomitus solo  
cristas cerebri deprimit ignei  
nec uictus audet tollere uerticem.  
Cingit coronas interea deus  
120 frontem duabus martyris innubae;  
unam decemplex edita sexies  
merces perenni lumine conficit,  
centenus extat fructus in altera.  
O uirgo felix, o noua gloria,  
125 caelestis arcis nobilis incola,  
intende nostris conluuionibus  
uultum gemello cum diademate,  
cui posse soli cunctiparens dedit  
castum uel ipsum reddere fornicem!  
130 Purgabor oris propitiabilis  
fulgore, nostrum si iecur impleas.  
Nil non pudicum est, quod pia uisere  
dignaris almo uel pede tangere.



## ⟨EPILOGUS⟩

Inmolat deo patri  
pius, fidelis, innocens, pudicus  
dona conscientiae,  
quibus beata mens abundat intus.  
5 Alter et pecuniam  
recidit, unde uicitent egeni.  
Nos citos iambicos  
sacramus et rotatiles trochaeos  
sanctitatis indigi  
10 nec ad leuamen pauperum potentes.  
Approbat tamen deus  
pedestre carmen et benignus audit.  
Multa diuitis domo  
sita est per omnes angulos suppelex  
15 fulget aureus scyfus  
nec aere deficit expolita peluis,  
est et olla fictilis  
grauisque et ampla argentea est parabsis,  
sunt eburna quaequam,  
20 nonnulla quercu sunt cauata et ulmo.  
Omne uas fit utile,  
quod est ad usum congruens herilem;  
instruunt enim domum  
ut empta magno, sic parata ligno.  
25 Me paterno in atrio  
ut obsoletum uasculum caducis  
Christus aptat usibus  
sinitque parte in anguli manere.  
Munus ecce fictile  
30 inimus intra regiam salutis.  
Attamen uel infimam  
deo obsequellam praestitisse prodest.  
Quidquid illud accidit,  
iuuabit ore personasse Christum  
35 [quo regente uiuimus].